

CHINESE - JAPANESE LIBRARY OF
HARVARD - YENCHING INSTITUTE
A1 HARVARD UNIVERSITY
APR 29 1940

T 3148/0.82

11

山西通志卷第二十三

山西巡撫都察院右副都御史臣覺羅石麟奉

旨修輯

山川七

澤州府

鳳臺縣

太行山在縣南三十里天井關橫望嶺諸峰雄峙為山總會西南接砥柱析城王屋又西迤姑射中條雷首東北跨陵川壺關潞城黎城遼州和順武鄉諸州縣又東為燕山至碣石綿亘數千里隨地異名北嶽霍山五臺句注蘆芽皆其支脉海內名山繇崑崙而下當以此山為第一云禹貢太行恒山至於碣石入於海正義地理志云太行山

哈佛大學漢和圖書館珍藏印

在河內山陽縣西北恒山在上曲陽縣西北太行去恒山
太遠恒山去碣石又遠故云此二山連延東北接碣石而
入滄海也顏師古註同山海經北次三經之首曰太行山 河

圖括地象太行天下之脊括地志太行山連亘河北諸州
凡數千里為天下之脊林少穎曰為河北脊以接恒岳文
翔鳳雲夢藥溪談太行為脊黃河

為腸中水郭緣生述征記太行首始於河內自河內北至幽州
凡有八陁第一軹關陁第二太行陁第三白陁此三陁今
在河內

第四滏口陁在鄴西第五井陘第六飛狐陁一名望都關第七蒲
陰陁此三陁在中山第八軍都陁在幽州爾雅山中絕曰陁元和志

連山中斷曰陁 程子曰太行千里片石衆山皆石上起
爾 朱子語錄太行山一千里河北諸州皆旋其趾潞州

上黨在山脊最高處過河便見太行在半天如黑雲然又

曰太行山極高晉州蒲坂山之盡頭又曰太行自崑崙北
支入中國西南行歷并冀三晉抵河東復與河會 王伯

厚地理通釋秦漢之間稱山北山南山東山西者皆指太
行以其在天下之中故指此山以表地勢 唐樞太行山

記山自北紀雲中發宗行平定州至上黨遼沁潞澤衍亘
多起彰衛懷三府南受藩垣中原自是西奔為中條至雷

首東發為燕山至碣石左右行皆其托祖故曰太行又以
介省故名省曰山之東山之西太行中原之正脈兩腋如

華蓋所以冒中原而重其力惟其起張兩脈故身不自結
而疑為所冒之中以其行局之宏非太行不足以當之而

其伊止之所乃所以為行之地蓋言意也 五朝志丹川
有太行山隋志同括地志太行山在河內縣北二十五里南

山西通志 卷二十三 山川 二
屬懷州北屬澤州 元和志太行山在晉城縣南四十里
山海經太行之山其首曰歸山其上有金玉其下有碧
有獸焉其狀如麕羊而四角馬尾而有踞其名曰駢善還
其鳴自訶有鳥焉其狀如鵲白身赤尾六足其名曰鷦是
善驚其鳴自訶 列子太形王屋二山方七百里高萬仞
淮南子武王克殷欲築宮於五行之山周公曰夫五行之
山固塞險阻之地也丹鉛錄太行山一名五行山高誘曰
五行之山今太行山也在河內野王縣西北上黨關也
崔伯易感山賦均然若鞍者曰鞍山突然若竈者曰竈山
色黑者曰黑山形方者曰方山 墨翟察而知驥之貴尸
佼過而辨牛之難穆王升由雀道而出世宗行自大河而
還孝明嘗登幸上黨郡章帝以游至天井關孟德北上紀

摧輪之恐謝公西顧引憂生之端阮籍失路而詠懷劉峻
懷交而發嘆歸晉陽子惠之便道對二坂祖濬之祥觀開
元錫問於逢車武德置縣而當煩霍襄吾襟共附吾肘纏
午壁之勢探長城之口天門揭其部分鳥嶺支其躡蹠姑
射王屋隆慮雷首靡迤嶽岑參錯釘餽或拱其左或捧其
右或導其前或贊其後讓以奇巘貢以重岫 六帖昔王
烈嘗入太行山聞雷聲往視之見山石上破數百丈石中
有一孔尺餘中有青泥流出烈取搏之隨手堅凝氣味如
粳米飯仙經所謂石髓也服之壽與天齊 蘇軾志林王
烈入山得石髓懷之以餉叔夜叔夜視之則堅爲石矣當
時若杵碎或錯磨食之豈不賢于雲母鐘乳輩哉然神仙
要有定分不可力求退之有言我能詰曲自世間安能從

汝巢神仙如退之性氣雖出世間人亦不能容叔夜婞直
又甚于退之也 上有孔子回車轍 王世貞適晉紀行
初九日黎明冒雨發道有古祠刻石崖表曰孔子回車處
按趙殺鳴犢孔子臨河而返此去河遠蓋傳會語也 陳
棐回車廟解經太行天井關關有孔子廟號曰回車石上
轍跡深尺長數十武客曰天井關俗亦名攔車父老傳爲
孔子見黃鼠拱立或曰小兒拱揖因之回車豈必盡誣陳
子曰古地志高都縣有天井關蔡邕曰太行山上有天井
關關在井北遂因名焉故劉歆遂初賦曰馳太行之峻坂
入天井之喬關史漢光武建元二年遣司空王梁北守天
井關擊赤眉別校是關亦兩漢三國前所設至于攔車之
名果俗因回車之妄附會之而狼車則又攔車流訛也

漢永平十三年登太行幸上黨 隋大業三年鑿太行山
達於并州以通馳道 唐元和二年北登太行山至天井
關

石人山在縣東南八十八里太行絕頂有石似人有龍潭

水經注丹水又逕二石人北而各在一山角倚相望南爲
河內北曰上黨二郡以之分境 郝經太行望詩西北兩

峰寒云是雙石人

按澤州山胥太行山
錄數山以概其餘

月院山在縣南六十里太行絕頂下臨天柱峰有潭深不可
測中挺峭峰鑱詩云溪潭直上孤峰底怪栢蒼蒼老不死
藜杖長拖嘯一聲虎豹潛形盡縮耳須臾有客話無生旋
煮新茶汲冰水樵歌依約耳邊來詩情只在烟嵐裏仙人
李題

黑石嶺在縣南八十里太行絕頂登其上中原胥在目矣
橫望嶺在縣南六十里 唐書狄仁傑自汴州參軍移并州
法曹親在河陽仁傑登太行山反顧見白雲孤飛謂左右
曰吾親舍其下瞻悵者久之雲移乃得去 王世貞適晉
紀行午飯萬善驛自是始入太行亦不甚險惡昇夫魚貫
而上久之以爲絕頂矣乃復有山障之愈上愈不窮至碗
子城爲豫并界兩山相對數十百丈巨壑陡絕無底中爲
嶺道石梁如玉雪又復數嶺回顧中原恂恍無盡平楚鬱
鬱紛吐蒼翠日色與雲氣爭長俄而雨繚數十里中亘其
半狂風驟發萬竅怒號食頃雨亦隨至誦唐人三晉河山
皆北向二陵風雨自東來語儼然若畫
洪谷元好問寶嚴紀行詩太行有洪谷勝絕無出右大似塵

外人省字見高秀哀湍下絕壑電激龍怒鬪崩奔翻雪窖
瑩滑瀉瓊甃

洞子巖在縣東十五里下臨聖字泓一名琵琶泓有黑虎洞
磨齒山在縣東二十五里有媧皇廟連珏山浮山丹水流其
下

龍門峽在縣東三十五里兩山夾流卽丹水也傳爲禹鑿
天池嶺在縣東三十七里巔石壁立如城南北二石門中容
千人古嘗建寨

玲瓏山在縣東七十里一名崆峒山有風穴

松林山在縣東九十里連晉普山白龍觀音二洞腹背分踞
浮山在縣東南三十五里連珏山磨齒山丹水流其下高似
雲浮北谷有媧皇窟中虛如囊相傳鍊石補天地 崔伯

易感山賦序太行一名皇母一名女媧庸或於此鍊石耶
今山連磨齒女媧祠

硤石山在縣東南三十五里雙石壁立如門丹水湍奔西有
擲筆臺上有青蓮山寺下有歎崖袤丈餘廣倍之夏秋暴
雨中罅似雷鳴相傳慧遠注涅槃經成擲其筆曰若疏義
契理筆當駐空已而果然 僧傳北遠法師作涅槃經疏
畢擲札於庭柳枝生焉

珏山在硤石山南一名角山上有欵月臺連浮山磨齒山丹
水流其下

蟠龍山二一在縣東南九十里一在縣西北六十里
龍潭峽在縣東南九十里 水經注丹水東南歷西巖下巖
下有大泉湧發洪源巨輪淵深不測蘋藻冬芹竟川含綠

雖嚴辰肅月燕麥暄萋 五股泉匯流陡下爲潭乃慧遠
說法地也

紫金山在縣東南九十里太行之支有黃龍洞東五十五里
有蓮花洞

十八盤 潦波 鐵櫛山胥在縣東南

九里谷在縣南九里 元李俊民詩連峰忽斷開山門
碾子谷在縣南二十里 宋石守信破李筠於此

香爐山二一在縣南三十里懸崖斷澗中峰突起太行之支
也一在大陽鎮西山上有虎跑泉

羊腸坂在縣南三十里盤曲如羊腸

天井谷在縣南四十五里

磨盤寨在縣南六十里

山西通志 卷二十三 山川 七
天柱山在縣南六十里

寶山在縣西南五里卽碧落之支下爲冶家河

吳神山在縣西南六里卽晉普之支上祀秦伯仲雍

玉仙山在縣西南三十里有白石先生洞

晉普山在縣西南三十五里積雪不消乃松林高峰也山有

九泉上有李衛公廟

松嶺山在縣西南九十里晉普山之次 楊廷秀詩澤居太

行巔繞郭山如帶西南古松嶺傑出羣峰外

萬松山劉龍靈巖寺藏經塔記澤西南有山曰萬松中有寺

爲靈巖其山蜿蜒綿亘雙峰矗聳若鸞鳳騰翥松檜森蔚

行竟日不見天日以是得名爲太行一支勝概寺亦茲山

佳境也

佛頭山在縣西南對峙晉普山

追山在縣西南

金剛嶺在縣西二里

五門山在縣西十二里連碧落山形似城墉有五門

桃固嶺在縣西二十里一名寨子嶺

可寒山二一在縣西三十五里連岳神山有乾明寺一在縣

東北三十里有龍王廟

岳神山在縣西四十里連陽城史山沁水榭山沁河流其下

上有天仙洞以樂氏二女名

方山在縣西四十里壁立如砥可寒之支也

洞陽山在縣西四十二里上有天仙廟

黃沙山在縣西四十五里晉普之支也有神仙掌

山西通志 卷二十一 三山川
碧落山在縣西北十五里連司馬山沙河流其下一名卧雲山

伊侯山在縣西北二十里沙河水源此 相傳伊尹從湯禱雨經此有伊尹廟

聖王山在縣西北四十里連司馬山有湯廟有顯化池

石佛谷在縣西北四十五里碧落山下皇甫湜詩曰漫漶太行北千里一塊石平腹有壑谷深廣數百尺又曰金仙琢靈象相好倚北壁花座五雲扶玉毫六虛射

梧山在縣西北六十里相傳梧邱子隱此

蟠龍山在縣西北六十里

香山在縣西北

吾山在縣西北

司馬山在縣北十里連聖王山上有晉司馬懿碑風土記司馬山在晉城晉代祠此因以爲名蓋司馬就司馬望胥守郡也一名小析山有嘉澗池泉之支源也

宿鳳臺在縣北四十里李村相傳晉太始元年鳳鳥集於高都之北

莒山在縣東北五十里有道泉溪卽浮山之支有藺相如廟金玉嶺在縣東北四十五里莒山左相傳藺相如持璧歸趙經此

步佛山宋紹興十年太行義士王忠植詣慶陽城下大呼曰我河東步佛山忠義人也

丹谷魏建義三年九月丙辰詔大都督行臺源子恭率步騎一萬出西道行臺楊昱募勇士八千往東路子恭仍鎮太

行丹谷 壬申爾朱世隆停建興之高都爾朱兆自晉陽來會之十二月壬寅朔兆寇丹谷都督崔伯鳳戰歿都督羊文義史作龍開柵降兆子恭奔退

丹水在城東北三十里舊號泫水源出高平縣西北仙公山南流入縣境經城東一里又出丹口南流三十里入沁河水經注丹水又東南流注於丹谷卽劉越石扶風歌所謂丹水者也 晉書地道記曰縣有太行關丹溪爲關之東谷途自此去不復繇丹水又逕二石人北又東南歷西巖又南白水注之又東南出山流注於沁謂之丹口 劉餗隋唐嘉話澤州北有丹水其源出長平山下傳云秦殺趙卒其水變赤因以爲名今上始幸太原知其故改爲懷水

雙泉在縣東三十里白湍奔流

乾河在縣東南八里白水至此伏流唐李德裕請令陳許兵過乾河立寨卽此 昭義腹心將高文端降言澤州兵大約萬五千人賊常分兵大半潛伏山谷伺官軍攻城疲弊則四集救之今請令陳許軍過乾河立寨自寨城連延築爲夾城環繞澤州李德裕奏請詔示王宰

溫泉二一在縣東南十里一在縣東三十里郭壁山中

五龍溪在縣東南三十里上建五龍宮

馬跑泉在縣東南三十里傳爲魏道武帝蹟

瀑水簾在縣東南三十里郭壁村一名水簾洞石崖高矗洞口有泉瀉崖而下 李俊民詩倒傾峻室瀉瓊瑰派落空巖雪浪堆

白水在縣南一里源出五龍池東入丹水 水經注丹水又

南白水注之水出高都縣故城西所謂長平白水也東南

流歷天井關晉太元十五年征虜將軍朱序破慕容永於

太行遣軍至白水去長子百六十里白水又東天井溪水

會焉白水又東南流入丹水謂之白水交 金志晉城有

太行山丹水白水天井關通考明一統志白水在城南三

里源出湖泓水東南流合丹水

天井溪在縣南四十五里注白水一名聖井關源出天井關

北流注白水土人名北流泉

小山泉水在縣西南三里一拳堵立泉出巖罅淙淙流響

洞靈泉在縣西南五里一名流盃泉

沙河發源伊侯山一流至東關一流至西關合入白水

錦溪在縣西七里夾岸屈曲

嘉潤池在縣北十里源出司馬山禱者誠則香楮沉不則浮

黑龍潭在縣東北十里司馬山下禱雨以石投之

源漳水在縣東北三十里源出可寒山東入丹水 漢地理

志高都苑谷丹水所出東南入絕水是也源漳水即源澤

水 舊唐志唐武德元年移丹川於源澤水北

琵琶泓楊謨詩晉城出郭十里餘百丈懸崖掛層屋耳聾不

聞琵琶聲但見一泓春水綠

淵靈泉在米山西谷有祠禱雨多應宋賜號淵靈

高平縣

七佛山在縣東五里高出山羣有淵靈泉左右環河上建七

佛寺

米山在縣東十里趙將廉頗積米於此土人名大糧山一說春秋米子國赤狄後有定林寺內定林泉西谷乃淵靈泉也金志有頭醴山米山丹水劉龍米山鎮修垣牆記高平縣之東南十里許有鎮曰米山居民稠密猶一邑然當澤潞之衝商賈輳聚百貨咸集

營房嶺在縣東十里廉頗屯軍於此背峰面澤有險可憑
好疇嶺在縣東十里旱蝗祭於此

龍窰山在縣東二十里山形崆葱土人傳可望黃河

風洞在縣東南十里山坡出恒三日入恒三日

游仙山在縣南十里前有游仙寺金李游仙讀書於此嘗啟地得古鐘聲徹山下數十里後年百歲終里人名里爲游仙坊山亦名游仙山

頭醴山在縣西南五里上建頭醴廟

懸壺山在縣西南二十里形似懸壺上有懸壺真人祠

卧佛山在縣西南三十里馬村鎮

玉泉谷在縣西南三十里石壁嶙峋下有清泉

吾山在縣西南四十五里接澤州境山有三峰

空倉山在縣西南四十五里秦白起詭運米置倉於此以給

趙括

金峰山在西郭外上有金峰靈巖寺

五龍山在縣西二十里上有五龍池禱雨多應傳爲慕容永時五色雲見地

浩山在縣西四十里有石朶山峰似花朶山西爲老馬嶺沁水界

董峰山在縣西四十里上有馬仙姑石榔

空箱山在縣西四十里形似箱

走馬嶺在縣西北十五里有鐵鑛

省窳谷在縣西北二十里唐志有省窳谷本名殺谷元宗幸潞州過之因更名

鳳頭山在縣西北四十五里發鳩山巔縣城遙望殆似補縣缺然

金門山在縣北五里土赤色耀日似金山當趙壘之門

韓王山在縣北十五里山形特起上平地數畝俯瞰羣山如培塿然相傳秦圍韓王於此有玉女泉

金山在縣北三十里形似覆釜一名朗公山朗公倉頡也上建倉頡廟

黑龍洞在朗公山下深數百步中有清泉

石室山在縣北三十里昕見五色雲晡散畢振姬嘗憇此

傘蓋山在縣北三十里長子界

仙公山在縣北三十里相傳張果老過此

牛心山在縣北三十里產石甚潤可硯

羊頭山在縣北四十里長子界有黍二畔其南陰地黍白其北陽地黍紅因之以定黃鐘陰地黍白乃高平界也

丹朱嶺在縣北四十五里長子界

發鳩山在縣北五十里丹水源此夕常聞風雨聲明月不輟蓮花山在縣東北十里迴峰曲嶂中有蓮花石

穀遠山在縣東北二十里羊頭山之次產紅嘴鴉

舍利山在縣東北二十五里上有五音洞下有舍利泉唐釋

山西通志 卷二十一 山川 三
大愚公隱此調演五音於洞中常聞五音不絕後撰韻母
三十上昭宗賜田及紫衣蓋洞中所調演也

翠屏山在縣東北二十五里層峰秀石

龍王山在縣東北三十五里上有石佛洞三教洞子孫洞石
渠

丹河源出發鳩山舊名泫水經縣境自西北而東南入鳳臺
縣境合白水穿太行山瀉於沁 上黨諸山之水建瓴而
下暴雨輒漲二三丈涌赤土似丹色然 祝志云方輿勝
覽謂白起坑趙卒於此血流成川斯蓋好奇之說恐未可
據 水經注沁水又東與丹水合水出上黨高都縣故城
東北阜下俗謂之源源水山海經曰沁水之東有林焉名
曰丹林丹水出焉卽斯水矣 出高都東北
當卽今長河 丹水自源東北

流又屈而東注左會絕水地理志曰高都縣有莞谷丹水
所出東南入絕水是也絕水出泫氏縣西北楊谷里地理
志曰楊谷絕水所出東南流左會長平水水出長平縣西
北小山東南流逕其縣故城泫氏之長平亭也白起坑趙
卒於此漢武帝元朔二年以封將軍衛青爲侯國其水東
南流注絕水 絕水當卽今浮雲河
長平水當卽今許河 絕水又東南流逕泫氏
縣故城北竹書紀年曰晉烈公元年趙獻子城泫氏絕水
東南與泫水會水導源縣西北元谷東流逕一故城南俗
謂之都鄉城又東南逕泫氏縣故城南世祖建武六年封
萬普爲侯國而東會絕水 此縣志所謂舊
名泫水者也 亂流東南入高
都縣右入丹水上黨記曰長平城在郡南山中丹水出長
平北山南流秦坑趙衆流血丹山由是俗名爲丹水斯爲

不經矣 唐志有泫水一曰丹水貞元元年令明濟引入

城號甘泉 通典高平漢泫氏縣西北有泫谷水故為名

通考漢志注泫氏楊谷絕水所出南至埜王入沁應劭曰

山海經泫水所出者也

天王池在縣治集賢橋西水族不生

舍利泉在開化寺

定林泉在縣東十里米山鎮北有定林寺山穴湧泉似噴珠

灑空可池可軒

淵靈泉在縣東十里米山西谷有祠禱雨多應宋賜號淵靈

橫澗河在縣南五里

許河在縣南二十里滙縣西南之水經許莊流入丹河

濟瀆池在縣西六里骷髏村

原潔泉在縣西二十里原村即許河之源也周四丈深一丈

五尺清而甘冬溫夏涼東西分引溉田西南流十餘里合

山澗經許莊名許河

此豈所謂二軍共食流水澗相去五里者耶

浮雲河在城北宋大中祥符元年龍見於河因名浮雲金皇

統元年龍復見

金龍泉在縣北二十里團池村相傳二魚時躍於泉遇雨即

飛去今名蓮花池

玉女泉在韓王山有玉女祠土人時禱雨焉

鴉兒溝在丹朱嶺南金明昌間張勝家溝南麓羣鴉驅之不

去

長河在縣東北南流入丹水環縈袤渺而七佛山界其中故

有東西長河之別

陽城縣

太行山在縣東南連析城王屋諸山 魏散騎常侍陸旭好老易緯候之學撰五星要訣及兩儀真圖得其指要太和後知符象遂隱於太行山

底柱山在縣東南五十里連析城王屋山 山有三峰中峰

最高秀其下皆土唯起峰處為石柱然故名西南三

十里為析城五十里為王屋 禹貢底柱析城至於王屋

孔傳此三山在冀州之南河之北東行 尚書註陝州

三門山有底柱石其形如柱似鑿後得名 正義地理志

云析城在河東濩澤縣西王屋在河東垣縣東北地理志

不載底柱底柱在大陽關東析城之西 按正義指底柱在析城之西是指陽

城底柱山也 通考禹貢底柱析城至於王屋太行皆在州境是

全有太行之險固 楊鵬翼詩方迎峭壁疑無路纔轉深

谿別有天

析城山在縣西南七十里太行支山 晁氏曰草木分析曰

析山峰四面如城 巔東巖有龍洞有龍池龍窠 上有

成湯廟二泉亢旱不竭傳為成湯禱雨地又傳泉通濟瀆

水經注上澗水南歷析城山北山在濩澤南禹貢所謂

砥柱析城至於王屋也山甚高峻上平垣下有二泉東濁

西清左右不生草木數十步外多細竹其水自山陰東入

濩澤水 顏師古註析城山在濩澤西南 劉昭註濩澤

侯國有析城山前志曰在縣西南 索隱析城山在河東

濩澤縣西南七十里 通典陽城縣有嶠嶢山濩澤水析

城山禹貢所謂砥柱析城也 通考 古今地名析城山方七

百里高萬仞是連王屋山言也 吳澄曰析城在王屋山西北七十里山峰四面如城有南門焉 王屋山志析城之山升白氣於天落五斗峰化爲濕雲自竇中滴水降太乙池 寰宇記山頂有湯王池土人傳湯旱祈雨處今池四岸生龍鬚草

王屋山在縣南八十里西南跨垣曲縣境 劉會孟曰在山西澤州唐武德間嘗升陽城縣治爲澤州 金志陽城有王屋山 程百二方輿勝覽山有三重其狀如屋與陸應陽廣輿記胥謂在陽城縣 山堂肆考王屋山在山西澤州陽城縣南上有仙宮洞天廣三十里狀如屋故名列子所謂愚公謀徙者卽此

盤亭山在縣西南八十里羣峰亭立一名塔樓山

鐵盆嶂在盤亭山左壁立千仞有石泉形若仰盂懸崖滴溜白孕謙鐵盆嶂大士殿碑記陽城西南多山其秀削攢竦稱最奇者惟盤亭盤亭之尤奇者惟鐵盆嶂嶂純石骨一壁萬尋而頂有微膚凝滑若脂方廣僅數尺當佛座下兼有神漢出自石隙珠滴成泉下有凹石仰承之涇涇晶徹儼若盆然嶂以此得名

嶢嶢山在縣西三十里下有濩澤縣址 水經注陽衆水東逕陽陵城南卽陽阿縣之故城也漢高帝七年封卞訢爲侯國水歷焦嶢山東下與黑嶺水合 五朝志濩澤有嶢嶢山濩澤山 通典嶢嶢山在濩澤縣 通考嶢嶢山在陽城

清凉龕在縣東二里厓巔有石室有風隧

峪溝山在縣東二十里蒼崖插沁曲礮穿林

小天壇山在縣東二十里形類王屋一峰聳峙俯瞰沁水

白孕謙小天壇山神廟碑東二十里曰劉善村當沁水之

隈其北一峰最為峭桀羣向諸山頰下之梯級始屆頂以

視王屋殆具體而微者耶舊有軒轅廟亦名小天壇或古

者用以副王屋也

金裏谷在縣東二十里谷中龍泉建海會寺松栢森蔚樓閣

參差曲水迴廊修篁游鯉所謂海會龍湫也張金銘嘗撰

種松銘并獨夜聽泉詩內有鳳尾竹清夜無風自響似金

玉聲所謂海會竹風也

虎谷在縣東三十五里屯城清溪懸崖 張慎言詩石室溪

橋泊水東蓋溪盡有小梁梁上懸崖有苗閣似飛樓云

可樂山在縣東三十五里層巒曲磴上有瀑布二徑數圍高

可數十丈山半有龕瀑布挂前似水簾

羊腸坂在縣東六十里下有棲龍池

北隱谷在縣東長河北南有梵洞

南隱谷在縣東長河南

小崦山在縣東南二里峭崖臨沁河上有甘泉

石門在縣東南二里兩山中劃澤水流其中 白孕謙石門

詩萬山奔一城石門當水口仰垂千仞壁清潭俯承曰

香臺山在縣東南二十里上有唐太宗廟

莽山在縣東南四十里相傳蕭王追王莽至此 峰巒雄亘

北巔曰北立門由此而下如入淵井行數十里至麓有紅

峪水轉而上如陟梯磴又十里至巔曰南立門側立一峰

曰繫馬椿有試劍山雙巖夾紅峪水巔有石人山又有三盤山

九女臺在縣東南四十里屹峙沁河中濤響轟雷上有九天仙女祠 陳廷敬九女臺北黑龍潭詩河流雨沄沄此山磬而控其北皆連峰排掇故縱送陡崖臨數仞潭水鬱湏洞相傳是海眼仰口若大甕

石塘洞在縣東南四十五里陽阿水入沁之側洞懸山坳白孕謙遊石塘觀龍潭登九女臺紀事石塘至臺頂不肯不嶽崎

小寨山在縣東南五十里沁水東繞有鳥道裁可容步隱谷在縣東南六十里巖谷嵌空下俯危崖側有梵洞龍崖在縣東南六十里崖半有龍洞燃炬行里許有潭

孤山在縣東南八十里

麻樓山在縣南四十里有東西中三峰相距四五里實不連屬

蒸餅洞在麻樓山南石壁百餘丈梯繩而上中長二百餘步昔人作板橋三十間今圯後有一泉可飲數百人

峰山在縣南四十五里孤起高峻

黑龍洞在縣南六十里西南深澗中林木環密有黑龍廟千峰嶺在縣西南四十里析城山東石壁臨清溪仄徑裁通修真洞在縣西南五十里臨澗村一名仙人洞洞門屹懸躋攀里許有石龍石象石獅石流蘇石爐石榻變幻千狀

雲濛山在縣西南八十里府志作九十里峭壁密林

鐘鼓山在縣西南百里垣曲縣界

卧虎山在縣西四十里山勢殊險麓有靈泉寺谷有萬松亭陶峪在縣西四十里峪左卽陶峪河也兩山對峙前突高阜

土人名石龍戲珠內建福勝寺寺側雙潭澄碧其一四周石厓水由厓出似門其一似盆左右蹲石似獅

畫山在縣西北三十五里形肖一畫

營匠山在畫山前舊志清淵水自表山而來疑卽此

靈通山在縣西北五十里山半有風洞

萬戶山在縣西北五十里登巔見縣舊治及聚落

傅齊嶺在縣西北七十里沁水縣界

白巖山在縣北三十里中有龍巖刹後圍柵障前鉤栢帶一石梁斜通巖壑上有地平廣六十弓又倚大巖壁立數十仞陟巔可望析城底柱莽樊諸山石梁東南彈碁石下有

泉 左崦山又左方山胥一山也 楊貞肅繼宗讀書于此

此

崦山在縣北三十里方山右東有白龍潭禱雨多應又有白

龍神洞 王國光詩谷轉出青池

方山在縣東北三十里形似憑几

史山在縣東北三十里產鐵西五里有金裏谷堆堆下有鐵

鑛

龍巖山楊繼宗嘗讀書於山有詩

金谷在龍泉寺前

隱洞白東谷居此東谷千佛精舍記子歸山中所居隱洞巖壑險絕獨西峰有洞名梵延

白澗嶺在濩澤水西下有濩澤泉

郎家山

沁河繇沁水縣郭壁鎮南入縣境東北屯城里經潤城東會百眼泉又經沁渡迤邐而南西匯蘆河澤河桑林河又東匯長河至公娥澗出山口建甌下注至潭懷匯丹水入河

沁河有潤城津 沁渡津 王村津 水經沁水又南

過陽阿縣東又南出山過沁水縣北按沁水出山始過沁水縣北宜考水

經注沁水南逕陽阿縣故城西魏土地記曰建興郡治陽

阿縣郡西四十里有沁水南流沁水又南與濩澤水合又

東南陽阿水左入焉又南五十餘里上下步逕裁通小竹

細筍被於山渚蒙籠拔密奇為翳薈也 沁水南逕石門

謂之沁口

濩澤在縣西北十里源出嶢嶢山東南流至平頭莊入於沁

豬水一泓澄瑩不竭縣名濩澤州名澤胥以此 西白澗

嶺下有濩澤泉東北流合沁河泉西有濩澤靈源祠 通

典澤州因濩澤水為名 金志有王屋山濩澤 濩澤城

西三十里澤城村漢置縣唐初改澤州治尋移端氏 世

紀堯求賢四岳薦舜堯命之于順澤之陽即濩澤也濩澤

之漁爭坻舜乃往漁焉鮫人異長爭以深潭與之 路史

淮南子云釣于河濱濩澤在今澤之陽城唐濩澤縣應劭

云澤在縣西北沁水東逕濩縣故城南漢之澤氏縣魏土

地記云陽阿有沁與濩澤水合者紀在梁惠王十九年晉

取文武濩澤黑子亦言舜漁在此故金鑰謂澤州為舜澤

十道記云澤州以濩澤得名皆在河東或云漁于濟陰雷

澤非也

棲龍潭在縣東六十里建龍神祠上有羊腸坂 陽阿水自章訓里經境內數十里至棲龍潭兩山夾峙一綫裁通石磴懸陡建甌瀑注乃入沁河焉 水經注沁水又東南陽阿水左入焉水北出陽阿川南流逕建興郡而其水又東南流逕午壁亭東而南入山泂波激石湍澗八丈環濤轂轉西南流入於沁水 俞時棲龍潭記盤渦伏流奇成自天 白孕謙棲龍潭神廟碑潭當谿谷衆流穿射之衝泓然深窈莫測底極或值暑雨秋濤蕩涌凌嘯及夫沍寒收潦湛然一碧若巨螺盛醞醪萬斛沿岸石凝滑如脂履之頭涔欲墜習傳其中爲神龍之宮潭遂以此名四外山雄立矗起稍南平岡迤靡磊然若畫置名曰龜山土人廟其陽享祀惟虔 徐乾學午園記午壁亭不見于志乘以道

元之言考之當在故陽阿縣南爲今高平縣西南界澤州西界與陽城接境其南五十餘里小竹細筍被于山渚蒙籠拔密又南則石門枋口迴轅孔廟接河南野王之地今考其形勢惟棲龍潭尤肖

沅水在濟源縣西源本太乙池東北流注於秦澤爲濟西源 灑水在濟源縣東北南流與西源合爲濟東源 水經濟水出河東垣縣東王屋山爲沅水 水經注山海經曰灑水出焉西北流注於秦澤郭景純云灑沅聲相近卽沅水也潛行地下至共山南復出於東邱今原城東北有東邱城孔安國曰泉源爲沅流去爲濟春秋說題辭曰濟齊也齊度也員也 漢地志王屋山沅水所出 釋名濟源也言源出河北濟河而南也 洞天福地記濟瀆源出王屋

山名沆水係清源王所理

玉泉二一在東關青陽坊街北元主簿丞相脫脫子禿必反
建清風亭一在西關同固北土人名西大泉

百眼泉在縣東三十里沁水濱有泉百眼滙流於沁

青蘿河在縣東南九十里源出底柱山緣谿環轉繇王屋山
下入濟源 山海經人魚在太行之東北二百里凡記鱖
魚鮓魚孩兒魚名鮓能緣聲如嬰兒土人云聞雷則
奔竄山谷

澤河在南郭外源出西三十里析城山之支東合清淵水卽
西河也自表山而來入於澤水逕城南折而東繇石門下
入於沁 水經注沁水又南與濩澤水合水出澤城西白
澗嶺下東逕濩澤墨子曰舜漁濩澤應劭曰澤在縣西北

又東逕濩澤縣故城南蓋以澤氏縣也竹書紀年梁惠成
王十九年晉取原武濩澤者也其水際城東注又東合清
淵水又東得陽泉水口又東南有上澗水注之水導源西
北輔山東逕銅干崖南歷析城山北自山陰東入濩澤水
濩澤水又東南注於沁水 路史陽城漢濩澤縣墨子則
言舜漁在此澤今在陽城西北十二里寰宇記爲烏虢切
矣郡國志言邑西今有地名舜田

桑林河在縣南四十里一名大河源出麻樓諸山歷西冶合
龍洞川水東北入於沁地多桑名曰桑林相傳成湯禱雨
於桑林卽此今湯廟前澗水澄泓不竭

盤亭河在縣西南八十里源出析城山麓滙諸澗水繞王屋
陰迅流而下瀑布垂巖懸河注壑南流入濟源界

西河自畫山經縣西南上王曲李邱遶縣西南入於澤河
水經注澤水又東合清淵水水出其縣北東南經澤城東
又南入於澤水

蘆河古陽泉水也發源沁水縣鹿臺山樓子坡經縣西北芹
池劉村蒿谷美泉孔寨至下孔入於沁 水經注陽泉水
出鹿臺山山上有水淵而不流其水東逕陽陵城南歷嶠
嶠山東下與黑嶺水合水出西北黑嶺下卽開蹬也其水
東南流逕北鄉亭下又東南逕陽陵城東南注陽泉水陽
泉水又南注濩澤水 陽泉水古入澤水今直入沁
長河發源鳳臺大陽鎮經縣境入沁河

龍泉明文翔鳳龍泉行險乃在濩澤之西芹池之東巖壁或
懸六七寺澗石頻推兩三松羊腸盤處天如帶豕腹脹時

水似弓 王國光曰海會亦名龍泉前有金谷 王惲憇

陽城北龍泉寺詩萬松亭廢久重拂短碑看詩注碑大定
間澤州刺史楊庭秀撰

靈泉司空圖靈泉禪院記中條發於蒲企於良傑出而爲太
行則天壇不得不冠冕嵩華爭勅日觀也其北川壑會流
盤鬱濃粹自高平西顧以至靈泉極矣泉之爲靈非惟利
物當以滋潤所及不育毒螫也

暖泉王國光詩泉暖猶聞野苻香

陵川縣

黃圍山在縣東南五十里孤峯插天陟巔見黃河山半洞內
有山有谷有風門有雲門有神井有石鴿雙飛有石乳塢
昔人秉炬深入四五里遇黃河一朽木不敢越而返洞口

一峰中空如門名天門 孫必振詩洞口霏霏烟霧輕莊
巖妙相當窻牖座後突兀說法臺寶塏玲瓏三五耦石乳
懸空滴蔗漿龍泉清冽嗽瓊玖四壁斑斕翡翠屏鳳篆龍
章雜蝌蚪石芝倒掛白鶴飛石脊蜿蜒蒼螭走

孤圍山在縣東七十里高十里盤踞八里四面山麓至此胥
爲絕壁周圍環合殊肖石城中突涌一峰青插天際惟飛
鳥可至其上水瑩巒映互相噴薄雖畫工不能摹也一名
孤峰山下有平田水

狀元峰在東川雙峰峭峙殊肖青萍吉祥院碑宋崔有孚十
五歲鄉貢第一二十五歲狀元及第蘇村墓表金武明甫
貞元中狀元及第明甫猶子武天佑承安五年狀元及第
天佑弟天和太和中狀元及第仕林莊墓表趙安時字全

老號東岡正隆間狀元及第官至中順大夫南京路兵馬
都總管上騎都尉天水縣開國子食邑五百戶賜紫金魚
袋安時弟安榮狀元及第又晉寧路李俊民狀元及第嘗
避兵邑之嵩山故建七狀元祠於東川

東海神山在縣東十一里

箕子山在縣東二十里遶高五里西南山麓石上巨人足跡
相傳箕子避地憇山中及武王訪以治道於此納履焉

花瓶山在縣東五十里遶高五里盤踞七里

板山在縣東五十里連熊耳山山方而峭

馬武山在縣東五十里周百里四壁峭立有漢馬武砦山中
棘無倒刺蛙不鳴土人傳漢光武蹟

風門山在縣東六十里連板山形似門

山西通志 卷二十三
天柱山在縣東八十里下爲輝縣泊

含珠砦山在縣東河南輝縣界

王莽嶺在縣東百二十里輝縣界

菊嶽山在縣東南五里高二里一名漳門山捍水口多菊上
建龍王祠

黃圍洞在東南五十里黃圍山夏邃莫測相傳達紫團翠微
洞云洞中石乳滴爲浮圖中有靈湫殊清冽旱禱輒雨

錦屏山在縣南二十里山形似屏霞彩標映產芍藥宋元豐
間都君錫棲此邑令呂由庚偕聞人高子美谷漢臣入山
訪之爲芍藥會焉

棲鳳山在縣西南四里東有泉繞山麓伏流

靈泉山在縣西南十里有靈泉

馬鞍山在縣西南四十里臨附城鎮

九仙臺在縣西南六十里石臺突起高數十丈相傳有仙棲
此丹成乃去

鳳凰山在縣西南七十里形似鳳接高都河至鳳臺縣五十
里

古賢山在縣西南七十里

志美名也

龍門山在縣西一里兩山橫亘中缺似門

魯山在縣西十五里上有松峰

秦嶺在縣西北三十里

寶應山在縣西北四十里迺高七里連長治西火嶺乃秦嶺
之北峰也雨則雲散於下霽則雲卧於上有甘泉傍有古
洞相傳寶應寺僧修寺取物料洞中寺成擁石閉洞化此

黃沙山在縣北十里高三里盤踞七里北接蒲水一名天一山又名太乙山

聖宮山在縣北二十里壺關界西南有蒲水流合丹河

嵩山在縣東北三十里接佛山五里

六泉山在縣東北四十里上有六泉自山半六泉洞中出

佛山在縣東北四十里矗高三里太行絕頂文翔鳳曰俯視

中州九千四百八十仞

熊耳山在縣東北四十里連六泉山雙峰峭對若熊耳然月

自峽中吐出

一斗水在縣東九十里山石上用之旋盈不用亦不溢可容

斗許接河南輝縣

平田水在縣東南九十里源出孤峰山下流注河南輝縣入

於衛

瀑布泉在縣東南百里懸崖瀉下似飛烟之輕漾一名鯉池

西溪在縣西南四里發源鳳山之麓

雙泉在縣西南四十里二井一甘一苦

清涼泉在縣西南六十里元好問曰陵川峙太行之巔天壤

間清涼界也

義井在縣西二十里汲以序

蒲水在縣北二十里發源聖宮山西南流入長平丹河東接

壺關馬鞍山

浙水在縣東北四十里經壺關界東南流入縣境又東流入

河南林縣注於滏陽

落雁池元郝經故第側擬汴金明池也 郝文忠充國信使

北還之歲汴中民射雁金明池得帛書云霜落風高恣所
 如歸期回首是春初上林天子援弓繳窮海羸臣有帛書
 中統十五年九月一日放雁獲者勿殺國信大使郝經書
 於真州忠勇軍營新館是時南北隔絕不知中統之久改
 至元也又文忠儀真館中雜題持節江頭久食魚館人供
 雁意踟躕呼兒細看雲間足恐有中原問訊書則故第之
 名落雁池也固宜事詳元史及宋濂題後王逢讀國信大使郝公帛
 書詩注公羈旅日有以雁四十餉公內一雁體質稍異命
 畜之於後雁見公輒張翮引吭而鳴公感悟擇日率從者
 二十七人具香北拜二人舁雁蹠其前手書尺帛親繫雁
 足且致祝曰羸臣某敢煩雁卿通信朝廷雁其保重欲再
 拜雁奮身入雲而去未幾虞人獲之於苑中以所繫帛書

託近侍以聞上惻然曰四十騎留江南曾無一人雁比乎
 遂進師南伐越二年宋亡書今藏諸秘監河南主客劉澹
 齋云

六泉出六泉洞

甘泉在寶應山味甘如飴

沁水縣

龍岡在縣東二里

夫妻嶺在縣東十五里迤東三十里連仙翁山嶺上高峰為
 尖山山東數十里有紫沙門相傳夫妻挽車力窮而斃張
 昌詩夫妻推車上長坂化為兩鳥常相偶 楊樹復授建
 州刺史鎮車廂及齊神武圍玉壁別令侯景趣齊子嶺樹
 恐入寇邵郡率騎禦之景聞樹至斫木斷路者六十餘里

猶驚而不安遂退還河陽

拾崇凹嶺在縣東十五里連將軍腰小堯嶺

馬邑山在縣東二十里金志沁水有鹿臺山沁水馬邑山

通考有沁水鹿臺山馬邑城

偃月山在縣東三十里一名車輞山

峰岳山在縣東四十里上有峰岳寺

三皇嶺在縣東五十里

紫金山在縣東五十五里

仙翁山在縣東六十里東南三十里連子沙腰東十五里連

榼山高壓羣岫繇仙翁而東南高峰倏峙是為三纏凹

三纏凹在仙翁山東南距縣七十里有奇明崇禎六年三月

丙午山西兵擊賊於陽城北張道濬設伏於三纏凹賊至

伏起擊之斬其魁生擒賊首滿天星闖王賊大奔巡撫許
鼎臣獻俘闕下奏道濬功第一按此闖王非高迎祥也

熊耳山在縣東六十里繇佛廟嶺而東兩山高峙

佛廟嶺在縣東六十里

林村嶺在縣東六十里

鳳凰山二一在縣東七十里連大尖山高峯迤東連岳陽浮

山界相傳秦始皇斬絕二十餘步一在縣東北十五里

孤山在縣東八十里一名筆山邑人常評事倫十五歲著筆

山賦曰山形噩山色碣驅神兵加斧鑿

榼山在縣東九十里清泉飛閣松栢參霄白松三左二圍一

丈五尺右一差小高胥數丈膚理瑩膩似雪山中萬松皆

然此其巨者耳明張五典三松說曰密縣白松彼一此三

其數不敵也今存二

金山在縣東九十里古端氏城西南

卧牛山在縣東百里一名大嶺橫亘十餘里上有西子梳洗臺東北爲欄杆嶺又東下陡立一峰名散石臺

文筆峰在卧牛山東一名華蓋

鬼山在縣東百里羣山綿延一名隗山 唐志端氏有隗山按山在古端氏城東勢甚峻巔有浮圖下有五龍祠

西岳神山在縣東百一十里山麓有賈封鎮在賈封者爲西岳神在湘峪者爲東岳神

岳神山在縣東百二十里鳳臺界高十里迤東北四十里連老馬嶺山麓爲湘峪村 張慎言勒石曰肫岳

樊山在縣東百二十五里山後即可樂山 午亭詩注樊山

一名芙蓉九藥山 陳廷敬老姥掌游記上黨南三百里有山曰方山又南十五里曰洞陽山又南十五里曰樊山三山高出地上皆直下萬仞繇樊山則枝分條披爲峰爲壑爲峭爲崑爲巘爲岫爲巖其又南則砥柱析城巖壁重複如樓堞如墉隍如玦如環繚絡數百里其中長川夾岸若斷若連蓋陟樊山之巔皆見焉樊溪東涘在山之南有曰老姥掌數十里之內聯嵐亘輝俯可搏擷如置諸掌 昔以掌名肖其形矣

元天洞在縣東一百三十里燕丹砦上

吳山在縣東百四十里山半有賈寨迤邐至東北爲蟠龍嶺上有馬跑泉

空倉嶺在縣東百五十里高平界相傳秦白起詭運米置倉

於此以給趙括

老馬嶺在縣東百五十里高平界迤北五十里連秋峪嶺

鵬黃嶺在縣東百六十里長子界崔府君蹟見搜神記

秋峪嶺在縣東百七十里高平長子界迤北三十五里連宇

峻嶺

子沙腰在縣東南八十里連方山南十五里連眼子腰梁家

莊陽城界下有沁河

石樓山在縣南二里峻嶒峩峩形似樓臺山半舊有石樓後

廢下有濯纓泉入杏谷水 何景明石樓賦沼清溪跨絕

澗控天梯鈎石棧羅羣山於膝下挺層臺於天半 彭甫

六柳莊記沁之南一里許有山曰石樓林巒峭壁川原奧

衍其畔有田田有泉自地湧出清冽可愛

鹿臺山在縣南二十五里迤東北二十里連石樓山御屏山

又迤東二十餘里連夫妻嶺高峻陰森夏日積雪山有文

石岡雙蟾嶺巔上時聞仙樂聲 水經注陽泉水出鹿臺

山山有水淵而不流 王暉鹿臺山詩注在澤州沁水縣

南二十里時被安西王命伐石於此詩曰遠尋文石岡來

歷南山纏鹿臺臺爲山幽徑蟠古篆後峪行未盡前嶺已

當面行經雙蟾嶺石怪驚變現闖首榭樹間氣自太古練

山海經有鳥狀如雄雞人面名曰鳧溪

小堯嶺連鹿臺山

御屏山在縣西南二里形似屏

南陽仙洞在縣西南五十里南陽村南山洞名仙人碣洞口

闕虛牖石蓮倒垂進數武石雲層湧色蒼白又百武洞高

至五六丈廣半之有石牀石龜石龍石獅石象又一里有石蓮臺石佛石鼓擊之聲徹洞外後有竇時聞風濤聲云鳳原岡在縣西半里高二里連玉嶺高峰繇玉嶺迤邐而下平岡表衍一名平原嶺水環抱

玉嶺在縣西五里迤西袤三十里連東塢嶺繇東塢嶺東南而下起伏蜿蜒至此突峙峻峰俯挹羣岫有澗曰龍池烽燧嶺在縣西二十里明初駐師於此

漢嶺在縣西三十里保義村相傳漢光武討銅馬賊經此杏谷在縣西三十里

天子嶺在縣西三十里保義村東南相傳蕭王討銅馬經此阜山在縣西四十里隋書名輔山 五朝志沁水有輔山金主簿夾谷陞擒賊常文憲作阜山戰勝傳

歷山在縣西五十里有舜廟廟側有瀉汭二泉北有大洪池小洪池西北有陶壑 谷幽榛密民居尠少

黃士洞在歷山西內有丹竈石牀

丹坪山在縣西六十五里白華村有下疊中疊上疊上疊有泉巔有平地三十畝山下為丹溝岳將軍七砦之一

關子門在縣西翼城界東南十餘里連拾崇凹嶺

東烏嶺在縣西北四十里南連關子門杏水源嶺麓 地理志名黑嶺避宇文諱易今名 縣志穆天子傳鉞陞即此

二山

山西郡縣志多書鉞陞胥涉傅會

碧峰山在縣北三里遙高四里盤踞五里東連鳳凰山又東連車轡山至河頭村下有沁河西十餘里連清風嶺高峰又十餘里連東塢嶺峭壁茂林建五龍神廟有靈泉東崖

有榭樹鼓掌聲應一名驚雞樹

大尖山在縣東北二十里東數里一岡橫亘北跨岳陽浮山
二縣袤五十餘里名橫嶺鶴鳴老人圖記曰長城

三尖山在縣東北三十里三峰並峙

宇峻山在縣東北百里長子界古名巨峻山 五朝志端氏

有巨峻山 金志端氏有石門山巨峻山 迤北三十里

連鵬黃嶺迤南折六十八里連佛廟嶺又西南三十里連

三皇嶺嶺下乃鄭莊也

洪谷唐洪谷子荆浩字浩然隱太行洪谷工丹青尤長山水
為唐季之冠所謂荆關董巨也

石門山

沁河在縣東十五里源出沁源縣綿山經岳陽縣東大匠村

入縣界大將村西南流經佛廟嶺紫金山間又經三皇嶺
車輞山間凡五十餘里至鄭莊村又南合梅河又東南流
五十里至端氏鎮又南流三十餘里至武安鎮入陽城界
西南流百五十里至河南濟源縣境復折而東經河內武
陟入黃河 水經注沁水又南與羈羈水合水出東北巨
峻山乘高瀉浪觸石流響世人因聲以納稱西南流注於
沁沁水又南與秦川水合水出巨峻山東帶引眾溪積以
成川又西南逕端氏縣故城東昔韓趙魏分晉遷晉君於
端氏縣卽此是也其水南流入於沁水 金地理志濟源
縣有太行山以沁水為界西為王屋東為太行 河有曲
堤渡 鄭莊渡 武安渡 沁河在懷慶府城北二里
枋口水在濟源縣東北三十里兩山之間沁水經焉舊以

枋木爲門故名晉司馬孚壘石爲之又名沁口 沁水自太行南出由枋口而東會堯王泉水又東丹水注之 魏建義元年六月葛榮使其僕射任褒率車三百餘乘南寇自沁水

梅河源出東烏嶺梅谷村東澗東流三十餘里合梅谷溝水名梅水又東流至縣東南合杏水又至河頭五十里入沁河

杏河源出東烏嶺陝溝村南澗南流三十餘里合杏谷溝水名杏水折而東十餘里合梅水

海子河源出秋谷嶺西南流至端氏入沁河

玉溪河源出空倉嶺西北流五十里至金峰東合海子河

慈泉在樊山巔 陳廷敬慈泉銘序樊山之陽高千仞未至

巔百步有泉在山徑沙石間坎甃清澈味甘冽異他水不盈不涸百鶴阡在其東故名慈泉

靈泉在筆峰山五龍廟內深尺許旱澇恒盈少污輒涸虔禱輒應相傳飲之却疾云唐李端金李廣明陳清胥有詩

義井在縣西二十里義井村地少水一井味甘百里人以次而汲無敢少紊

蘆河在縣西四十里發源鹿臺山西流至陽城縣東十八里入沁河

可陶谿在歷山西北傳爲舜作陶器地

龍潭在縣西北二十里

馬跑泉在漢封村內石崖上相傳蕭王馬跑地得泉

濯纓泉

山西通志卷第二十三

山西通志卷第二十四

山西巡撫都察院右副都御史臣覺羅石麟奉

旨修輯

山川八

蒲州府

永濟縣

中條山在縣東南十五里山有桃花元女二洞及谷口蒼龍等泉以其中狹而延袤不絕故名又以南北狹薄亦名薄山其陽跨芮城平陸垣曲其陰跨臨晉解州安邑夏縣聞喜境 中山經薄山之首曰甘棗之山其水出焉西流注於河又東二十里曰歷兒之山又東十五里曰渠豬之山渠豬之水出焉南流注於河又東三十里曰葱蘢之山

穆天子傳東巡自河首襄山又云登薄山寘軫之陞 史記封禪書薄山者襄山也顏師古曰說者云薄山在河東一曰在潼關北十餘里而云自華以西名山者則今閩鄉之南山連延西山竝得華山之名 漢地理志蒲坂有堯山 楊雄河東賦河靈攬踢掌華蹈襄注襄山在潼關北十里 水經注雷首山臨大河北去蒲坂三十里尚書所謂壺口雷首者俗亦謂之堯山山上有故城世又曰堯城闕駟曰蒲坂堯都按地理志曰縣有堯山有祠雷首山在南事有是而非非而是千載眇藐非所詳耳 括地志蒲州河東雷首山一名中條山亦名歷山亦名首陽山亦名蒲山亦名襄山亦名甘棗山亦名渠豬山亦名獨頭山亦名吳山此山西起雷首山東至吳坂凡十二名隨州縣分

之

通同考

索隱雷首山在河東蒲坂縣東南顏師古註在蒲

坂南

唐志永樂有雷首山元和志雷首一名中條在河

東縣南十五里永樂縣北三十里

都穆遊名山記中條

卽禹貢雷首

山堂肆考山西平陽府蒲州東有中條山

跨平陸芮城安邑夏縣解州之境乃張果老跨白驢之處

後魏河東羅崇之常餌松脂不食五穀自稱受道於中

條山世祖令崇還鄉里立壇祈請崇之云條山有穴與崑

崙蓬萊相屬入穴中得見仙人與之往來詔令河東郡給

所須崇之入穴行百餘步遂窮世祖曰崇之修道之人豈

至欺罔或傳聞不審而至於此赦之

何晦摭言徐商相

公於中條山寺讀書隨僧洗鉢

宋李瀆淳澹好古博覽

經史多聚書畫頗有奇妙往來中條山中不親產業所居

木石幽勝談唐室已來衣冠人物歷歷可聽 韓愈條山
蒼詩條山蒼河水黃浪波沄沄去松柏在山岡

首陽山在縣南三十里卽雷首南支也峰巒嶸嶸萃競爽二華

一名方山殷伯夷叔齊隱此歿葬山麓 禹貢雷首注在

河東郡 孔傳首陽在蒲坂南 馬融曰首陽山在河東

蒲坂華山之北河曲之中 水經注涑水出河北縣雷首

山縣北與蒲坂分山有夷齊廟闕駟十三州志曰山一名

獨頭山夷齊所隱也山南有古塚松柏蔚然攢茂邱阜俗

謂之夷齊墓其水西南流亦曰雷水昔趙盾田首山食祁

彌明翳桑之下卽於此也 索隱西山卽首陽山 正義

曹大家注幽通賦云夷齊餓於首陽山在隴西首又戴延

之征西記云洛陽東北首陽山有夷齊祠今在偃師縣西

北又孟子云伯夷居北海之濱首陽山說文云首陽山在

遼西史傳及諸書夷齊餓於首陽凡五所各有案據莊子

云伯夷叔齊西至岐陽見周武王伐殷曰吾聞古之士遭

治世不避其任遇亂世不爲苟存今竝乎周以塗吾身也

不若避之以潔吾行二子北至於首陽之山遂饑餓而死

又有詩登彼西山是今清源縣首陽山在岐陽西北明卽

夷齊餓處也 通典河東有雷首山夷齊居其陽所謂首

陽山也通考寰宇記首陽卽雷首之南阜也 路史餘論

夷齊冢廟在蒲之蒲阪首陽山之南馬融顏師古之說同

而高誘乃以爲洛東北去二十里之首陽山杜預阮籍之

徒咸以爲然更謂二子餓死在是卽今二山皆有夷齊冢

廟九域志兩從之戴延之竊以爲疑按夷齊之蹤當在河

東首山者雷首也是爲中條一曰薄山一山九名卽黃山

也山海經和山者實爲河之九都吉神泰逢司之于黃山之陽出入有光東陽有黃山孔甲畋處字音培其神

云河神一云陪尾山世紀云卽東首陽山太平御覽作黃山音爲頻謬矣據河南郡境界簿云

城東北十里首陽山上有首陽祠夷齊所居而黃太史又以或者指武師渡孟津二子叩馬而諫當以洛陽爲是夫首山之名所在固不一曹大家云在隴西而今隴西有地曰首陽東有烏鼠山謂之首陽而許叔重言首陽則正在遼西今遼之和順東實有山曰首陽俱有祠廟其在吳郡亦有首山豈得偏爲據耶論語注蒲阪陽區山者俗號首陽而黃子且以爲無餓死事按呂氏書夷齊至岐陽而文王已歿武王卽位爲載書三以其一歸夷齊聞之相視而笑乃北行至首陽餓焉石曼卿云死蒲阪者恥周之事而

死於堯舜之區庶幾見揖巽之風焉則亦非洛陽矣伊川程氏謂止是不食其祿非餓不食聖言噉日而衆言猶不一惜哉楊奐題二賢祠詩跋癸丑二月望奉天楊奐題

首陽山夷齊廟同里王璨張端平陸員擇從行都穆記

中條爲雷首首陽乃首山之陽非雷首也魯論餓於首

陽之下與魏風首陽之巔同一首陽馬季長說不可易

漢志蒲阪有首山祠首陽一名龍頭酈註謂墓在山南非

後魏正始元年六月戊戌詔立周旦夷齊廟於首陽山

當係洛陽宋大中祥符四年祀汾陰駐蹕河中府令訪

伯夷叔齊廟遣官致祭政和三年封濰州呂樂縣昭賢

廟孤山伯夷爲清惠侯盧綸題伯夷廟詩中條山下黃

疆石壘作夷齊廟裏神子華子問鼎黃帝之治天下也

百神出而受職於明堂之庭帝乃採銅於首山作大爐焉
鑄神鼎於山上 郊祀志黃帝採首山銅鑄鼎於荆山下
晉灼曰地理志首山屬河東蒲阪荆山在馮翊懷德縣
也 論語撰考堯修壇河洛擇良日具玉率舜登首山道
河渚 漢元封六年春作首山宮應劭曰首山在上郡於
其下立宮廟也文穎曰在河東蒲坂界師古曰尋此下詔
文及依地理志文說是 漢志蒲坂有首山祠 山堂肆
考郭緣生述征記華山與首陽山本同一山河神巨靈擘
開以通河流故掌跡至今存焉 呂柟詩地生連理樹山
有叵河村

歷山在縣東南三十里上有舜廟山下二泉名媯汭卽堯釐
降二女地也 楊雄河東賦登歷觀而遙望兮聊浮游以

經營樂往昔之遺風兮喜虞氏之所耕 師古曰歷山上
有觀也晉灼曰在河東蒲阪縣 鄭康成曰歷山在河東
水經注郡南有歷山謂之歷觀舜所耕處也有舜井媯
汭二水出焉 正義括地志歷山南有舜井又云越州餘
姚縣有歷山舜井二所又有姚墟云生舜處也及媯州歷
山舜井亦云舜所耕處未詳也 唐志河東有歷山 張
守節曰媯州涿鹿城在山側黃帝堯舜之所都也皇甫謐
曰舜所都或曰潘今上谷也此胥疑辭不足據 唐顯慶
三年太尉長孫無忌議仍隋制祭舜於河東以臯陶配永
泰二年從刺史元結請詔道州舜廟宜蠲近廟佃戶充埽
除是歷山祠在前而九嶷祠在後也桂林府堯山虞山唐
帝虞帝祠碑刻亦係大曆以後 輿地碑目虞帝廟在永

州學西唐元結作舜廟狀及舜祠表俱江華令瞿令問篆刻石上是永州舜廟無唐以前碑也永州舜廟詩舊志謂漢載侯熊渠作而詩乃唐體或漢有其詩而逸之魏地形志濟南郡歷城有舜山祠娥皇祠曾鞏齊州二堂記史記五帝紀謂舜耕歷山漁雷澤陶河濱作什器於壽邱就時於負夏鄭康成釋歷山在河東雷澤在濟陰負夏衛地皇甫謐釋壽邱在魯東門之北河濱濟陰定陶西南陶邱亭是也以予考之耕稼陶漁皆舜之初宜同時則其地不宜相遠二家所釋雷澤河濱壽邱負夏皆在魯衛之間地相望則歷山不宜獨在河東也孟子又謂舜東夷之人則陶漁在濟陰作什器在魯東門就時在衛耕歷山在齊皆東方之地合於孟子按圖記皆謂禹貢所稱雷首山在

河東媯水出焉而此山有九號歷山其一號也予觀虞書及五帝紀蓋舜娶堯之二女廼居媯汭則耕歷山蓋不同時而地亦當異世之好事者廼因媯水出於雷首遷就附益謂歷山爲雷首之別號不考其實矣由是言之則圖記皆謂齊之南山爲歷山舜所耕處故其城名歷城爲信然也按曾子固記但可備一說九域志歷山有三濟南濮陽河中池陽灃陽潘城始寧等處皆有之舜居安原名媯墟亦名姚墟在漢中西城縣西北杜甫贈李八秘書詩萬騎略姚墟無錫九龍山一名歷山唐湛賁伏覽呂侍郎渭邱員外丹舊題十三代祖歷山草堂詩因書記事曰識曲遇周郎知音荷宗伯以渭居永樂嘗仕禮部侍郎也賁又有題歷山司徒右長史祖宅詩魯連子舜耕歷山而交益陶河濱

而交禹 史記舜耕歷山歷山之人皆讓畔 琴操舜耕
歷山思慕父母見鳩與母俱飛相哺益以感思因而作歌
晉干寶曰舜耕歷山獲玉曆於河際之巖

九峰在縣東南六十里純陽宮上山峰有九形勢秀拔高下
列序道院名爲王椅上有純陽洞呂祖修真於此

方山在縣東南百二十里純陽宮後嵐鬱溪縈首陽山一名
方山指中條全體而言也方山最高峻五老峰亦俯其下
是指東南百二十里之方山而言也

玉峰在縣東百里名山記第五十一福地侯道華證果處也

玉峰在河中

書院坡在縣東五里北穿峨嵋原東通解州上有河中書院
瓦窰坡在縣東五里路入東鄉

普救坡在縣東五里南臨深溝北有普救寺路通猗氏臨晉
等地

雲蓋峰在縣東三十里壁立插雲中條北最高峰也

土龜原在古城外東南

谷口在縣東南十五里中條山陰之西麓

介谷在縣東南

蒼龍谷在縣東南十五里中條山陰之中麓名山記作蒼龍
舊志作蒼陵非 劉致孫氏先塋碑殿試君攜家違難中

條山之蒼龍谷

大谷口在縣東南十五里中條山陰之東麓

曇延洞在縣東南十五里棲巖寺東隋時曇延講經於此曇
延棲巖寺僧也今墓祠在臨晉縣北十五里耽子村 李

山西通志 卷二十四
端遊棲巖寺詩晚上曇延洞通霄興莫窮高明千嶂月清
爽一巖風

寶玉峰在縣東南二十里山勢起伏一名抱榆峰

焦嶺在縣東南六十里焦盧里以地名嶺

猫耳山在縣東南百二十里純陽宮上以形似名

玉簪山在縣東南百二十里永樂鎮純陽宮側松竹交列桃

李爭芳人擬為武陵源

玉洞在縣東南百二十里中條之陽

玉皇原在縣東南百二十里永樂鎮東 何志淵柏臺記左

顧玉皇之原

按玉澗水南出玉溪北流逕皇天原西周固
記開山東首上平博方可里餘三面壁立高
千許勿漢世祭天于其上名之為皇天
原玉皇原蓋因河南皇天原而名也

姚嶺在縣東南

水峪口在縣東南

峨眉原在縣南五里高十餘丈南北綿亘東西盤折跨臨晉

猗氏萬泉滎河解州安邑夏縣境

東盤山在縣南十五里中條山之陰 明三邊總督楊南澗

覽而悅之曰是將休我廼誅茅葺屋鑿池疏圃以偃息吟

嘯於中

筆架山在縣南十五里中條之北數峰羅列中高末下拱對

郡城

棲巖在縣南十五里中條山內有棲巖寺

八盤山在縣南二十里中條之北峰也八折至巔轉南即為

歷山

堯山在縣南二十八里上有堯城水經以為唐堯所理

虞原在縣南三十里歷山之東段干木隱此

麻谷山在縣南三十里中條之迤北峰也數峰競秀羣壑爭流

放馬坡在縣南歷山前昔戍軍牧馬於此今猶名東草坪西草坪

神嶺在縣南歷山之東兩水夾注

獨頭坡在縣南四十里雷首一印也突兀當道外臨大河內

穿峻坂東入夷齊祠南達潼關 河東有獨頭山多青檀

可為良弓 樂史太真外傳徙居蒲州永樂之獨頭村此

其地也

風陵坡在縣南六十里黃河北岸

鳳凰山在縣南七十里中條南麓盡處對明潼關衛 吳雯

詩鳳嘴三春麥龍頭六月冰 鳳嘴即鳳凰 龍頭即首陽許國張文毅墓

誌銘嘗讀書中條之鳳鳴山學者稱鳳磐先生

青臺原在縣北二十里

舜原在縣北二十里相傳虞舜生此

白道坡在縣東北五里上枕峨嵋原路通臨晉土人名古官

道即驛路也河東舊驛在縣北一里黃河護岸上

吉安坡在縣東北十五里跨峨嵋原路入北鄉

蘇村坡在縣東北二十里路通榮河

草坪山張四維鴛漿泉詩序予覽山海水經諸編所述中條

經山有鴛漿者謂其水居山頂渟滙不流冬夏常滿驟用

之不加損也亦不以水旱盈涸予甚喜之乃為詩以紀其

勝俾來者有考焉

黃河在蒲津門外自龍門經河津滎河臨晉南流入縣境又南至風陵渡折而東經芮城平陸垣曲入河南澠池縣境明隆慶四年水漲溢入城西門及南北古城門是年河西徙萬曆八年復決而東甃石岸以障之自後西去城十餘里今復東徙水經河水又南過蒲坂縣西又南涑水注之又南至華陰潼關渭水從西來注之河水歷船司空與渭水會河水又東北玉澗水注之河水又東逕闕鄉侯河東與全節鳩澗水合又東過河北縣南水經注地理志曰縣故蒲也王莽更名蒲城應劭曰秦始皇東巡見有長坂故加坂也孟康曰晉文公以賂秦秦人還蒲於魏魏人喜曰蒲反矣故曰蒲反也薛瓚注漢書曰秦世家以垣爲蒲反然則本非蒲也皇甫謐曰舜所都也或言蒲坂或言

平陽及漢者也今城中有舜廟魏秦州刺史治太平遷都罷州置河東郡郡多流離謂之徙民郡南有歷山媯汭二水出焉尚書所謂釐降二女於媯汭也西注入於河

雷首山臨

大河北去蒲坂三十里涑河在關內南流潼激關山因

水出河北縣雷首山之東

涑

謂之潼關河水自潼關東北流水側有長坂謂之黃卷坂傍絕澗涉此坂以升潼關所謂沂黃卷以濟潼關矣關之直北隔河有層阜巍然獨秀孤峙河陽世謂之風陵戴延之所謂風塹者也南則河濱姚氏之營與晉對岸汲冢竹書紀年曰晉惠公十五年秦穆公帥師送公子重耳涉自河曲船司空漢書地理志曰舊京兆郡之屬縣也左邱明國語曰華嶽本一山當河河水過而曲行河神巨靈手盪脚蹋開而爲兩今掌足之跡仍存華巖開山圖曰有

巨靈胡者偏得神元之道能造山川出河所謂巨靈鼻屨首冠靈山者也

河北縣與湖縣分河蓼水出襄山蓼谷西南流於河 唐天寶六載詔河瀆為靈源公十載

河可二十餘里 永樂溪水南入於河

封西海為廣潤王西瀆大河祝版文惟神上通雲漢光啟

圖書分道九枝旁潤千里素秋戒序用率典常 宋乾德

六年祭西海河瀆竝於河中府 大中祥符元年十一月

進號河瀆曰顯聖靈源公遣官往河中府祭告四年親祀

汾陰后土還至河中親謁奠河瀆廟 康定二年增封西

海為通聖廣潤王河瀆為靈源王 宋李瑩禱河祠而生

瀆故名瀆字河神 舜南風操有黃龍兮自出於河負書

圖兮委蛇羅沙 潘岳關中詩絳陽之粟浮於渭瀆 媯汭泉在縣東南五十里歷山之中南流者為媯北流者為

汭東西相距二里合流入黃河 孔安國馬季長呂忱王

肅杜預皇甫謐以為媯水之曲非也 水經注歷山有舜

井媯汭二水出焉南曰媯水北曰汭水迺逕歷山上有舜

廟尚書所謂釐降二女於媯汭也孔安國曰居媯水之內

王肅曰媯汭虞地名皇甫謐曰納二女於媯水之汭馬季

長曰水所出曰汭然則汭似非水名而今見有二水異源

同歸渾流西注入於河 爾雅水北曰汭 五朝志河東有首山有媯

汭水 寰宇記出河東縣南三十里首山南流媯北流汭

路史媯本作瀉羸也舜所都蒲坂今之河東有瀉水逕

首山下復一水曰汭瀉南汭北西注河有帝廟然潘城饒

汭皆有媯名而泗水亦有媯亭長沙有媯水皆有祠去都

遠矣 金志河東有中條山五老山黃河瀉水汭水 河

東舜廟記二泉在首山東北山中通典媯汭水今有舜廟在焉其廟周宇文護所造通考唐天祐二年封帝二妃祠為懿節祠

舜井在東關古城二井東西相對有舜祠皇甫謐曰河東

有舜井宋真宗祠汾陰幸舜泉下詔曰朕以省巡蒲坂

歷覽舜泉欽孝德以升聞考遺跡而尚在宜加表稱用表

淳風乃賜名廣孝泉周其垣墉新其堂奧廣其里街謹其

扃鐫復汲泉水徧頒著位大中祥符五年命王欽若撰廣

孝泉記蒲瀕河地鹵水鹹泉獨甘美中山記蒲陰昌安

郭東舜氏甘泉即此

鴉兒溝在縣東五里峨嵋原兩崖多穴寒鴉

竹溪在縣東十里石莊有竹溪寺溪後湮

五姓湖在縣東三十里五姓村臨晉縣界受涑水會姚暹渠

之水即古張揚池也又西流經孟盟橋入於河一名五姓

灘

泓龍潭在縣東四十里孫李村龍祥觀後北流五里入姚暹

渠上有泓龍神廟

鴛漿泉在縣東五十里草坪山不流而止土人名止渴泉明

張文毅有碑一云在芮城按鴛漿泉以芮城為正

古井在城內東南隅白塔寺大旱不涸

桑落泉在縣東南五里古城外土龜原水經注郡多流離

謂之徙民民有姓劉名墮者宿擅工釀採挹河流醞成芳

酎懸食同柘枝之年排於桑落之辰故酒得其名矣然香

醕之色清白若滌漿焉別調氛氲不與它同蘭薰麝越自

成馨逸方土之貢選最佳酌矣自王公庶友牽拂相招者
 每云索郎有顧思同旅語索郎反語為桑落也更為籍徵
 之雋句中書之英談 唐志河東有芳醞監汲河以釀武
 德三年置貞觀十年廢 唐國史補河中桑落坊有井每
 至桑落時取其寒暄得所以井水釀酒甚佳故庾信從蒲
 州刺史乞酒詩蒲城桑葉落灞岸菊花秋許乞酒一車未
 送詩秋桑幾過落春蟻未曾開謂此也 永濟泉胥發源
 中條山惟廣孝桑落二泉出平地 明崇禎四年八月總
 督洪承疇兵大敗延安賊趙四兒於山西桑落鎮趙四兒
 卽點燈子也

神龍潭在縣東南十五里太谷村乃中條山水谷口也其旁
 有谷口泉蒼龍谷口泉胥入黃河

玉龍潭在縣東南十五里贊歎寺下

蒼陵泉在縣東南十五里王莊卽谷口水源也

柳溝泉在縣東南十五里棲巖寺東

大黃泉在縣東南十五里中條山北麓

觀音泉在縣東南十五里鹿谷上有白石寺

梨花泉 龍母泉胥在縣東南十五里中條山大谷中

大谷口泉在縣東南二十五里大谷口水源也

水谷潭在縣東南二十五里水谷村瀑布飛掛

永樂澗在縣東南百二十里純陽故宅與山海經東則渠豬

之水亦合舊志以水經注河水又東北玉澗注之遂謂卽

玉泉澗而引皇天原玉溪諸蹟今永樂東相傳有玉皇原

又李商隱寓永樂自稱玉溪生終涉傳會 水經注水北

出於薄山南流逕河北縣故城西故魏國也晉獻公滅魏以封畢萬卜偃曰魏大名也萬後其昌乎後乃縣之在河之北故曰河北縣也今城南西二面竝去大河可二十餘里北去首山一十餘里處河山之間土地迫隘故魏風著十畝之詩也城內有龍泉南流出城又南斷而不流永樂溪水又南入於河予按中經卽渠豬之水也太史封禪書稱華山以西名山七薄山有其一焉薄山卽襄山也徐廣曰蒲坂縣有襄山山海經曰蒲山之首曰甘桑之共水出焉而西流注於河東則渠豬之山渠豬之水出焉而南流注於河如准封禪書二水無西南流河之理今診蓼水川流所趨與共水相扶永樂溪水導源注於河又與渠豬勢合蒲山統目總稱亦與襄山不殊故楊雄河東賦曰河靈

獲踢掌華蹈襄注云襄山在潼關北十餘里以是推之知襄山在蒲坂蓼水卽渠豬之水也

寒谷澗在永樂純陽故宅西

疑卽其水

通濟溝在縣南十里鐵爐舖前

柳溝在縣南十五里棲巖寺東南石門側

顯明泉在縣南十七里歷山村東

飲馬泉在縣南五十里胡營隋代王遣屈突通守河東戰久不下唐高祖留兵圍之遂濟河破其將桑顯和於飲馬泉通大懼乃留堯君素守蒲而率兵趨潼關

大凹西溝在縣南六十里歷山舜祠側古祭地在焉

臨山泉在縣南六十里中莊

老陳溝在縣南六十里中條山古有陳姓牧馬於此

大楊溝在縣南七十里大楊村

澗口溝在縣南七十里基城通大楊溝

諸老溝在縣南百里觀後

玉洞泉 寒谷泉胥在縣南百里觀後二泉相鄰胥入黃河

涑川左傳伐我涑川 水經河水又南涑水注之 水經注

水出河北縣雷首山西南流亦曰雷水穆天子傳曰壬戌

至於雷首戎觴於雷首之阿乃獻良馬四六使孔牙受之

於雷水之干是也涑水又西南流注於河春秋左傳謂之

涑川者也俗謂之陽安澗水 按府志不載豈以溷夏縣涑水故耶

南澗唐敬括羨魚賦序閏正月旬有八日李翟二侯命子於

邑之南澗以求魚也

藍水在河中

顯應潭在城內西南隅通化坊其水不盈後廢

雷澤在縣西南首陽山下南流入河相傳舜漁此

古北灘在縣北一里黃河退水地出沒不常

鏵嘴溝在縣東北四十里西下村

洗腸泉在白石寺佛圖澄出腸浴於泉號洗腸菩薩至今泉

上有血絲痕

石笋溪盧綸奉陪侍中遊石笋溪詩雙壁瀉天河一峰吐蓮

萼潭心亂雪卷巖腹繁珠落 侍中渾瑊也時鎮河中辟綸元帥判官

臨晉縣

蛾眉原在縣北五里自聞喜之嶺口迤邐連夏縣猗氏又連

縣境西抵黃河

大嶽山在縣東北三十五里

小嶷山在縣東北三十五里大嶷小嶷二山南北竝列故志

曰二嶷

按五朝志桑泉有三嶷山通考桑泉有三嶷山金

嶷邑志又彙書二嶷晉郡縣舊志之闕略率類此

東亭谷在谷口村

朔坂水經注漢水西南流歷朔坂西流注於河

按朔坂當卽蛾眉原之別

名也

黃河在縣西三十里北自榮河南流繞縣之右又南入永濟

縣境水經河水又南逕陶城西水經注舜陶河濱皇

甫士安以爲定陶不在此也然陶城在蒲坂城北卽舜所

都也南去歷山不遠或耕或陶所在則可何必定陶方得

爲陶也舜之陶也斯或一焉孟津有陶河之稱蓋從此始

之南對蒲津關汲冢竹書紀年魏襄王七年秦王來見於

蒲坂關四月越王使公孫隅來獻乘舟始罔及舟三百箭
五百萬犀角象齒焉

涑水東南二十里自猗氏西流入縣境又西入五姓湖達孟

盟橋入黃河鹽法志源出絳縣橫嶺山乾洞伏流盤束

地中而復出西流聞喜縣南經夏縣界西之水頭鎮又西

至安邑縣北經猗氏縣崔家灣稍西經智光底胥村城子

埒勃落頭諸村直入五姓湖其舊道則自猗氏入臨晉之

坑頭鎮西南合姚暹渠水入湖若水經注則云涑水出河

東聞喜縣東山黍葭谷又西過周陽邑南又西過其縣南

又西南過安邑縣西又南過解縣又西注於張陽池稱述

又與舊道異永濟民多壅孟盟橋側灘爲田湖時溢東

沒鴨子池楊趙申劉諸營胥浸周建德五年春正月辛

卯行幸河東涑水集關中河東諸軍校獵

漢泉在縣西三十里吳王渡黃河岸側爾雅泉根云漢水

出尾下郭璞山海經註河東汾陰縣有漢水源在地底

潰沸湧出其深無限名之曰漢馮翊郤陽縣復有漢亦如

之相去數里而夾河河中渚上又有一漢漢源皆潛通在

汾陰者人壅其流以為陂種稻呼其本出處為漢魁明

一統志泉有五郤陽有四此有其一異出同源故曰漢大

似車輪時恒沸湧里人因立神淵廟又云漢泉水有三一

在臨晉一在同州一在郤陽而縣志則云漢泉在郤陽者

為王村為鯉為東鯉為勃池為夏陽凡五駁一統志二說

為矛盾按喬潭雙漢泉賦曰始開雙鳳發輝於汾魏之郊

豈榮河臨晉二漢魁即雙鳳耶又曰雖一河有隔

終陰隙以相連故數眼分開涵涵碧虛而共潔

則明一統志之說未為無稽縣志不宜駁

五姓湖在縣西南三十里村有五姓即古張陽池也涑水姚

暹渠胥注於此水經注涑水又西南逕張陽城東竹書

紀年齊師逐鄭太子齒奔城張陽南鄭者也漢書之所謂

東張矣高祖二年曹參假左丞相別與韓信東攻魏將孫

林邀軍東張大破之蘓林曰屬河東即斯城也涑水又西

南屬於陂陂分為二城南面兩陂左右澤渚東陂世謂之

晉興澤東西二十五里南北八里南對鹽道山西陂即張

澤也西北去蒲坂十五里東西二十里南北四五里冬夏

積水亦時有盈耗也

湯井在縣西北四十里程樊村相傳湯始鑿撓之不濁汲之

不竭

回龍溝在縣東北十五里相傳晉文公距秦兵見蛾眉原有

王氣斷之得蘆根盈握血出王氣遂消

桑泉在縣東北十五里今帶村里泉村北社村古桑泉地也

泉久湮

國朝康熙十二年知縣潘士瑞嘗於東北溝得甘泉

虞鄉縣

中條山在縣南七里西自永濟之草坪頭東至解州之紅臉

溝靜林寺東西凡四十里卽臨晉中條山舊境也

志虞鄉有石錐山百梯山百徑山是古之虞鄉疆域越五

老峰也 金志虞鄉有雷首山中條山檀道山 胡濙五

老峰訪張赤脚詩分明記得經由處只在中條第一峰

方山在縣治西南一名檀道山山海經名檀首山水經注名

鹽道山又名百梯山其巔方坦又名方山峒堯插漢爲中

條之首五老峰亦俯其下巔有靈峰寺及宋廢永樂元廢

虞鄉址寢荒 宋司馬光栢梯寺詩衆壑如翻浪羣州似

列棋 陳奕禧詩鴛漿頂上無人跡誰識銅芸與女疎

明張佳孕望方山詩石鼓鳴深洞鴛漿灌紫芝 檀道之

高與二華爭雄水經注曰石壁千尋璠溪萬仞卽今之青

石掌洪流崖也方嶺雲迴厥頂方平此方山所繇名也緇

服鹿裘之遊謂靈峰塔院也連木乃陟百梯方降今之百

梯村其遺名也張文毅之屐至蒲州草坪而止記鴛漿泉

似誤若明一統志檀道山在解州南五里中有鴛漿泉此

耳食之誤不足置辨 王禹偁詩店荒檀道絕寺古栢梯

懸

五老山在方山東城西南十里峭壁千尋危磴削立援鐵絙

而上其南最高曰玉峰一名靈峰 山有雷公洞上洞在
歸雲巖下洞在北峰有東西錦屏峰峰之陰有張果老洞
洞東西有白驢行跡又韓君隱此號韓峰峰東南有韓君
洞羅通微隱此號真人洞又有青城太乙玉峰蒼龍太白
王母白沙元武保德諸洞洞之陽有棄瓢巖嵩山羽士李
皮囊嘗棄酒瓢以奠山神又號皮囊洞旁有龍井禱雨輒
應唐元宗勅玉真公主投金龍其中號玉真洞山麓又有
飲鹿金龜金沙玉女諸泉 論語備考堯率舜游首山觀
河渚有五老游河渚一曰河圖將來告帝期二曰河圖將
來告帝謀三曰河圖將來告帝書四曰河圖將來告帝圖
五曰河圖將來告帝符有頃赤龍銜玉苞舒圖刻版題命
可卷金泥玉檢封盛書威曰知我者重童也五老乃爲流

星上入昴山以此名

任昉述異記同

寰宇記今河東縣故永樂東

北十三里有五老山又河西縣西十七里有五老仙人祠

晉張僧鑒潯陽記五老峰橫隱蒼空其形勢如河中虞

鄉縣五老山 王汾書王禹偁五老峰詩後先公翰林尚

書淳化中謫官解梁作是詩後八十餘年汾出守蒲津刻

石於王官谷元豐二年二月十一日曾孫尚書祠部郎中

充集賢校理權知河中軍府事汾謹記 舜南風操反彼

三山兮商岳嵯峨天降五老兮迎我來歌 楊巨源酬裴

舍人詩二如樓下宜臨水五老祠西好看山

栢梯山在栢梯村卽檀山半也巒巘懸絕連木乃陟百梯方

降鑿石闢蹊憑崖標閣 劉行忠幡竿銘栢梯山寺之西

南岑南臨峻嶠北負率原崢嶸萬仞蕭條千里鳳生牝谷

韻清響於禪林澗入猴池靜涓流於定水長蘿絰日層岩擁雲幽溪不春還壑無景殊形詭狀不可殫論 宋司馬光詩笑談空谷應步武白雲隨衆壑如翻浪鄰州若布碁靈峰在縣南二十里卽五老峰之南峰也峰最高一名玉峰一名靈角峰 宋陳協用方山靈峰寺記寺之元守內界從下方西天門外至青石嶂從青石嶂至洪流崖從洪流崖至西北隅從西北隅至十八盤竝是上寺元守相繼分畔 洞天福地記五十二福地玉峰在河中府 張維重刊王元之二詩序中條山上方靈峰寺舊立三石刊模解梁薛王二公中條山及五峰詩後歷年所許昌之詩石一泯焉而沒求之弗可得黃州之詩石二偃仆階所苔封雨駁文字缺落亥豕相資讀之而弗克通者迨將半矣大夫

江公命僧崇緒治平無名之石一重照舊本刊模黃州之二詩庶幾永垂於後爾

王官谷在縣東南十里石樓峪西峪南爲芮城界峪北爲臨晉界有唐司空圖別墅 谷內有天柱峰峰東西胥有瀑布水東注者行山中百里有奇出夏縣王峪口其北流者爲貽溪 司空圖山居記中條蹴蒲津東顧虞鄉纔百里亦猶人之秀發必見於眉宇之間故五峰頽然爲其冠珥是谿蔚然涵其濃英之氣左右函洛乃滌煩濟賞之境會昌中詔毀佛宮因爲我有谷之名本以王官廢壘在其側今司空氏易之爲徵陵谿亦曰徵貽云愚以家世儲善之祐集於厥躬乃刻像大悲跂新構於西北隅其亭曰證因證因之右其亭曰擬綸志其所著也擬綸之左其亭曰修

史勗其所職也西南之亭曰濯纓濯纓之牕曰一鳴皆有
所警堂曰三詔之堂室曰九籥之室皜其壁以模玉川於
其間備列國朝至行清節文學英特之士庶存聳激耳其
上方之亭曰覽照懸瀑之亭曰瑩心皆歸於釋氏以栖其
徒愚雖不佞猶幸處於鄉里不侵不侮處於山林物我天
伐亦足少庇子孫且詎知他日復覩睟容訪陳跡者非今
茲誓願之證哉久於斯石庶幾不昧有唐光啟三年丁未
歲記又有休休亭記 宋俞充王官谷十詠 竹逕 貽
溪 休休亭 表聖影堂 天柱峰 瀑布 雙人石
司空氏舊居 石硯表聖云西谷路有石如硯人謂之秦王硯機磴 貽溪懷
古十詠又有掛鶴臺東渠亭 水磴院宋時僧寺蹟莫考
谷中存數機磴行山麓密林三里水聲乍大乍細曲繞而

上亭聳似梁其下轉旋噴湧如積雪迎風自是紆迴數折
乃見瀑布匯流焉 休休亭始名濯纓西牕名一鳴亭居
谷中特高西北有證因亭亭右曰擬綸左曰修史靈臺架
構峭石嶽疊東西二巖距里許山雨漲發聲似雷飛流注
壑盛暑陰寒北面平臺興兼曠與宋虞鄉令樂沉重修上
有白雲洞元李孤雲構了了亭於下明御史張仲修建觀
泉亭後廢 東渠亭對峙西巖時見玉峽雙白龍西渠西
一里徑通芮城繇此陟東渠巔可南望黃河紆疊窈窕瀑
來似緩勢彌峻響彌宏泉亦差甘冽昔臨晉令鑿平稜峭
乃減西渠之勝云 三詔堂在天柱峰下其室名九籥丹
崖堊壁四周環映柳州所云幽幽可以處休宥宥可以觀
妙者殆奄有之 覽照亭高出諸亭對谷中有北巖衆峰

倒影空翠有無孤松環屈不着根殊奇 瑩心亭當瀑布
 中流軒牕飛雨纖翳不生後亭廢 了了亭北有聚仙堂
 堂南白雲洞孤雲子棲此今止存石泉橋橋在石泉洞西
 望天柱峰高入霞表與五老峰遙峙云 秦王視在谷西
 嶺大如碾底尖如磴天行雨輒潤 閔使君宅在王官谷
 上方舊志使君名案唐貞觀十四年為河東太守後隱谷
 中羅通微貿薪事之十九年拜吉州刺史通微偕往遂冲
 舉於玉笥山使君表上其事 按國史補閔吉州案表請入
 道賜名遺榮戎昱贈詩曰廬
 陵太守近隲官月 錢希白南部新書司空圖舊隱三峰天
 祜末移居中條山王官谷周迴十餘里泉石之美冠於一
 山北巖之上有瀑泉流注谷中漑良田數十頃至今子孫
 猶存為司空之莊耳

中州集晁洗馬會虞鄉縣齋云宦况薄於重榨酒瓜期
 近似欲殘棋王官谷云烟藏芳樹遠雲補斷山齊鄉人至
 今傳之 吳虔詩危磴千峰翠飛泉萬仞冰

天柱峰在王官谷南瀑布經其西樂沆司空先生隱居記有
 墓俯天柱峰下 雙人石在天柱峰東怪偉參差形似拱
 揖又峰西石二似人直秦視或曰此谷中四友也表聖詩
 雙人依木立 掛鶴臺在天柱峰下東南隅表聖時五月
 生子輒去二月復來臺下多靈草異卉葳蕤搖颺 藏雲
 洞在蘆葦泉南昔曹仙姑棲此泉殊甘孤雲子塔秦無隅
 塔錯列上為八仙洞北望峨嵋兩巖空濛滅沒 吳雯詩
 轉忘千徑曲陡見一峰高峻欲卑三詔尊將俯六鼇

錦屏峰在五老山東西列繡

張果洞在五老山錦屏峰之陰石上有白驢行跡

太乙峰在五老山

步虛坪在太乙峰南唐羅通微遇閔使君家授以幻養之術遂冠褐於五老峰之遊仙觀學步虛絕粒太乙峰南步虛坪其遺跡也後改降生之羅村爲蓮臺村王朔村爲仙鶴村受業觀爲靈峰觀

韓峰在靈峰觀南一名韓角峰韓君丈人隱此抱朴子韓終服菖蒲十三年身生毛目視書數萬言皆誦之冬袒不寒

石佛寺谷栢村在寺西南泉水下注聲振崖谷高坡栢盈萬森立僧雨後掃葉數斗輒有錢如鷺眼多唐時年號云吳郡虞汝明古琴疏帝相元年條谷貢桐芍藥命羿植桐

於雲和命武羅伯植芍藥於後苑武羅伯諫曰上方崇厥德怪草奇木懼遷厥嗜宜食駕車之善馬不從於是作誼諫羿乃伐桐爲琴以進善之名曰條谷後居於商邱援琴作源水之歌歌曰涓涓源水不壅不塞轂旣破碎庸大其輻事已隳矣乃重太息寺南有楊家寨乃石山也相傳楊業裔屯兵處

石錐山 百梯山 百徑山 隋志河東郡虞鄉有石錐山百梯山百徑山

涑川在縣東北四十五里繇猗氏崔家灣入縣境經智光水頭北解故城東北解故城西觀底胥村城子埒勃落頭六橋入湖涑水西流經聞喜縣南又經夏縣西三十里水頭鎮卽司馬溫公故里又西至安邑縣北二十里經猗氏

山西通志 卷二十四
入縣故道自坑頭鎮西南合姚暹渠入湖明弘治十六年
御史曾大有以姚渠首中太狹涑水闌入爲鹽池害請濬
河八十里自猗氏崔家灣開引稍西卽今水道也 水經
注涑水又西南逕解縣故城南春秋晉惠公因秦返國許
以河外五城內及解梁卽斯城也涑川又西南逕瑕城晉
大夫詹嘉之故邑也春秋僖公三十年秦晉圍鄭鄭伯使
燭之武謂秦公曰晉許君焦瑕朝濟而夕設版者也京相
璠曰今河東解縣西南五里有故瑕城

貽溪在王官谷內唐司空圖易名徵貽溪 司空圖說魚蒲
之東七十里山秀而瘠故其水迅激不能蓄鬻介之族著
於方志焉王官谷司空氏曰徵貽溪其巖瀑尤爲隋束愚
常派貯於亭欲資涵泳之翫或致於他所亦不更夕輒暴

去前年捧詔西上復移疾華下則鄰之佛者遽至言石竇
泉隙魚皆充物愚熟念竟不能究其說而佛者謂吾久於
是溪雖才嗇而命弛然撫其愛育之心足以達其物類蓋
斯魚之產是欲信吾心於方將耳而愚尚以爲愧也且爲
羈涉歲而後魚集於故山之泉彼能達吾之心宅幽而遠
害是有物致之且感愚之妄進姑欲全吾道而保退安耳
敢不自警也哉 俞充貽溪詩注溪舊不蓄魚及表聖居
石竇泉隙魚皆充物見說魚篇今亦無魚

東瀑布泉 西瀑布泉胥在王官谷內繇天柱峰東懸流百
尺而下西瀑尤奇出王官谷入沙 冬時泉脉微循崖而
流涓涓一線沍寒則冰崖百尺似白虹倒懸至春夏飛湍
直下望之似懸索水所注石胥成穴噴珠濺玉夏月數十

步外寒冽逼人東瀑崖少曲湍亦差緩崖上蒼苔歲久胥
玲瓏為石似羊脾狀昔人謂大樹五百年化為青羊信矣
二瀑經休休亭前合流出谷 俞充瀑布詩注瀑布之亭
曰瑩心又詩云瀑布吟吹衣 匡廬瀑布忽為驚風所掣
則中斷不下久之飄入雲際如飛球捲雪迸珠散玉瞬息
萬狀王官瀑布殆為一致 吳雯東瀑布詩東嶺鬱巖窅
逶迤下玉龍香巖通一線雲窟簇諸峰又西瀑布詩坐臥
西巖下層冰落絳臺三春常夢雨十月忽聞雷

鴛漿泉在方山巔久湮塞相傳深不可測有神物宅其下與
湖潛通明隆慶間霪雨或言方山白龍為崇御史郤永春
沉鐵牌磔黑犬以厭之尋以鐵甕塞其口是夜大雷雨折
山巔塔龍移湫去 按蒲州志鴛漿泉在州東五十里草坪
山張四維鴛漿泉詩序步草坪巔元泉

宛滙明一統志檀道山在解
州南五里中有鴛漿泉胥誤

蘆葦泉在王官谷內泉甘

鴨子池在縣西北八里即水經注所謂東陂之晉興澤也王
官諸谷新水河經流注此 池在五姓湖東姚暹渠南孟
盟橋淤則湖水泛濫東注於池而姚暹亦有倒灌之患矣
五姓湖在縣西北二十五里即古張楊池涑水姚暹渠經流
之所也村有五姓因名 後魏地形志河東郡北解縣有
張楊池 括地志張楊故城一名東張城在蒲虞鄉縣西
北四十五里 東起鴨子池西連湖尾又西接孟盟橋東
西六十里胥水鄉也晉興澤張澤雖不可細折而水勢差
可髣髴 明朱峻嶻博學有盛名不慕榮利築居五姓湖
輕舟蠟屐與名士登臨吟嘯自號蘆花散人有佩蘭集行

於世

姚暹渠在縣北十里繇解州北境入縣境經石衛舖北杜家營橋土橋孫南鎮北入湖 舊名永豐渠水出夏縣東巫咸谷西流經安邑縣下留村苦池水入之又自安邑城北西流六十里經解州北境至縣西北流入五姓湖隋大業中都水監姚暹所開故名

國朝雍正九年署刑部侍郎韓光基疏湖灘一區原係姚暹渠涑河會歸之處向因涑河上流沿河居民私決灌田任漫溢村莊不由故道歸湖故有水退灘淤之地今臣議疏故道引水歸湖

蘆子泉在搶峰西北麓舊傳武后以術士言虞鄉有王氣遂斷縣南龜背岡至見蘆根而止血出化為泉

此亦好奇之說與臥虎山

丹河相類

洗馬泉在洗馬村南相傳晉太子洗馬於此
明月泉在三王嶺之陽

猗氏縣

千佛嶺在縣南八里自聞喜香山來至縣西香落村止涑水西流過源頭村將南行嶺隆起逼捍之

鳴條岡在縣南二十里自安邑來分條繚繞土人傳有舜陵峨嵋坡在北門外東連聞喜西入蒲坂綿亘蜿蜒青坪如級至縣北析支南行為縣治 城東龍岩寺當中條稷山之豁景尤敞朗

涑水河在南六里由聞喜西流經縣南境合姚暹渠入臨晉五姓湖 涑水故道自安邑北相鎮西入邑境鳴條岡至

此而伏故自李漢郭村間折而南順治中郭村人嘗掘地見大石橋云又折而東南經張河孫塢等村今謂之張河灘又折而西南歷楚侯王鑑張嵩諸村俗稱管溝又西南經太侯上莊及解州南扶等村又西南逕臨晉卿頭等村入五姓湖後引而之北自北相鎮西北開新道西行經三里高頭里原頭水南香落等村至河家莊南崔家灣折而南經祁村及臨晉南村卿頭等村合姚暹渠入五姓湖至明弘治十六年巡鹽曾大有復西浚新道八十里自崔家灣引而西爲今涑水河道 水經涑水又南過解縣東水經注涑水又西逕猗氏縣故城北春秋文公七年晉敗秦於令狐至於刳首闕駟曰令狐卽猗氏刳首在西三十里縣南對澤卽猗頓之故居也涑水又西逕郇城詩云郇

伯勞之蓋其故國也杜元凱春秋釋地云今解縣西北有郇城服虔曰郇國在解縣東郇瑕氏之墟也 金志有涑水

對澤在南門外水經注縣南對澤猗頓之故居也

澤泉在南門外地故偃瀦浸泉成澤萬曆間坡水大至泉遂澱塞

南澗卽涑水故道北有黑龍潭潭左有泉南流可十里餘後廢

黑龍潭在縣西南二十里廣半畝深一丈潭左有泉

雙壁泉在縣西北五里二泉湧出南流五十餘步

文波泉在縣東北自城東遶城南入涑水

萬泉縣

山西通志 卷二十一 四
介山在縣東十五里相傳介子推隱此 地理志汾陰介山
在南 師古曰介山在汾陰東北 唐志有介山 水經
注鄧邱在介山北卽汾山也其山特立周七十里高三十
里文穎言在皮氏縣東南側可三十里乃非也今準此山
可高十餘里山上有神廟廟側有靈泉祈祭之日周而不
耗世亦謂之子推祠楊雄河東賦曰靈輿安步周流容與
以覽於介山嗟文公而愍推兮勤大禹於龍門晉太康記
及地道記與永初記竝言子推所逃隱於是山其實非也
予按介推所隱者綿山也文公環而封之爲介推田號其
山爲介山杜預曰在西河介休縣者是也 文穎謂其山
特立酈道元謂高十餘里當以今之孤山爲介山 漢武
帝紀詔曰朕用事介山祭后土皆有光應 楊雄傳三月

將祭后土上廼帥羣臣橫大河湊汾陰旣祭行遊介山回
安邑顧龍門覽鹽池登歷觀陟西嶽以望八荒

稷王山在縣東三十里稷山界下有漉漉泉

黑石山在縣東南三十五里石可磨碑碣文色青黑

栢林在孤山東南隅上有崑崙臺

孤山在縣南二里高十五里盤踞八十餘里以不接他山名

孤山一名方山以其四面胥方也又以山基綿延名綿山

西半隅有檻泉南麓有雙泉又有桃花洞其東谷有暖泉

又名東谷澗上有法雲檻泉寺 唐志猗氏有孤山 山

海經名景山 宋鄧忠臣雙泉記孤山之東南有祠曰風

伯雨師右有泉二源在山之上下 元毛鐸風伯雨師廟

記近邑之山爲綿山山東南之巔有古祠焉祠下有臺曰

崑崙耆耄相傳漢之建武九年光武親幸登是臺而祀之因封之曰風伯雨師之祠勅修其宇明猗氏高籙採藥

孤山相傳遇劉操授長生訣坐一窰驅石若飛云

桃花洞在孤山南麓曩多桃樹故名相傳唐羅士信隱此元

劉仙翁海亦羽化於此有登仙石遺跡

鷓石崖在孤山南峪有鷓常巢於上有鷓石泉

峨嵋嶺邑境隸其巔

東澗在東門外孤山北壑隨地湧泉北流六里入沙

漉漉泉在縣東四十里稷王山下

永清池在縣東南二十里相傳漢光武飲馬於此水甚濁鞭

攪卽清今流潦入池尋輒激澈

雙泉在孤山東麓栢林迤西二泉湧出一在山半一在山麓

土人名上泉下泉宋熙寧五年鄧忠臣撰雙泉記嘗謂此泉可飲數千戶歲旱禱能興雲雨廣陵朱康叔行縣與子同謁祠下探源留觀久之顧謂予曰茲勝境也惜其未名可名曰雙泉因書於石

聖水泉在孤山陽歲旱不竭

鷓石泉在孤山南峪鷓石巖下南流合聖水

煖泉在孤山陰秦王寨右數穴湧出隆冬不冰東澗之流泉

居其半一名和豐泉

半截桶泉在孤山陰黃家峪泉如桶水止不流

檻泉在孤山西麓一名兔泉相傳建檻泉寺時白兔掘穴得

泉

西澗在西門外北流三里入沙

山西通志 卷二十四
惠民池在崇德坊西街北明典史王懋創鑿坊曰王公惠民池坊

榮河縣

峨嵋坡在城東逶迤高四里北連聞喜南貫臨晉上多平原東南一峰差聳曰靈吉 山南坡曰亞夫土人傳亞夫屯軍於此曰番底距城十里達臨晉運城道曰高村又南爲白馬廟爲師家崖 山北坡曰寺坡曰風坡曰倉李曰長坡又北爲后土廟爲孫石崖起伏巨細不等形勢聯絡唯后土白馬二阜左右相顧 坡間有大溝曰百峪小溝無筭宋汾陰朝覲壇頌原隰相屬瀾迤而龍鱗堆阜孤標崛吻而雲矗書載媯汭在其境詩歌韓奕亘其右靈掌標於巨嶽素汾合於洪河逸勢奔趨迅湍激射

汾陰雕在汾水南有長阜背汾帶河長四五里廣二里餘高十丈汾水歷其陰西入河漢書謂之汾陰雕應劭曰雕印類也 汾雕其地隆起若尻雕然宋成慶軍是 廣韻鉅靈坐於汾雕宋華陰縣北一百二里有鉅靈廟九域志鉅靈祠河中府也

穆陵關山在縣北十里南北開朗至關則東西兩山壁立如門車不能方軌石刻曰古穆陵關

朔坂漢水經流坂西

黃河自河津南流入縣境又南入永濟縣境在縣西逼城汾河古在縣北后土祠旁西流入黃河明隆慶中移河津葫蘆灘南入黃河 元和志汾水在寶鼎縣北二十五里水經又南過汾陰縣西 水經注河水東際汾陰雕縣故城

山西通志 卷二十四
三
在睢側漢高帝六年封周昌爲侯國號土地記曰河東郡北八十里汾陰城北去汾水三里城西北隅曰睢邱上有后土祠封禪書曰元鼎四年始立后土祠於汾陰睢邱是也又有萬歲宮漢宣帝神爵元年幸萬歲宮東濟大河而神魚舞水矣昔趙簡子沈欒激於此河水又南漢水入焉 水經又西至汾陰縣北西注於河 水經注水南有長阜背汾帶河阜長四五里廣二里餘高十丈汾水歷其陰西入河漢書謂之汾陰睢應劭曰睢邱類也汾陰男子公孫祥望氣寶物之精上見祥言之於武帝武帝於水獲寶鼎焉遷於甘泉宮改其年曰元鼎卽此處

漢魁泉在縣南二十五里南趙村西距黃河三里泐澤方丈水經注漢水出汾陰縣南四十里西去河三十里平地

開源瀆泉上湧大幾如輪深不可測俗呼之爲漢魁古人壅其流以爲陂水種稻東西二百步南北一百餘步與郃陽漢水夾河中渚上又有一漢水皆相潛通故呂忱曰爾雅異出同流爲漢水其水西南流歷朔坂西西流注於河縣志知縣侯祁相地脉掘得之與深則不測差別唐有漢水 府 喬潭雙漢泉賦呀厚地而濫湧者有河東之漢泉拆陰開竇沃日浮天初汨沒圓衡拂高湍於尋祗之下復逶迤遠注散餘波於馮夷之川

南屈村泉 北辛莊泉 孫石泉 王信泉

山西通志卷第二十四

山西通志

卷第二十四 山川

三

山西通志卷三十四

南風林泉 井辛其泉 潞石泉 王詩泉

潞石泉 王詩泉

開資天日 天降田文 國壽特高 壽外壽外

開資天日 天降田文 國壽特高 壽外壽外

開資天日 天降田文 國壽特高 壽外壽外

開資天日 天降田文 國壽特高 壽外壽外

開資天日 天降田文 國壽特高 壽外壽外

開資天日 天降田文 國壽特高 壽外壽外

開資天日 天降田文 國壽特高 壽外壽外

